

嘉業堂
叢書

中書典故彙記

第三册

中書典故彙紀卷三

仁和王正功輯

錢塘趙輯寧校補

職掌下

典籍之設 國朝相沿明制考其職掌卽古祕
書省也祕書亦嘗隸中書故并錄之至于諡號
表箋及殿試請 寶司之典籍統于輔臣自本
朝始而列代之典故附載焉

周禮太史掌建邦之六典又有外史掌四方之志三皇
五帝之書漢氏圖籍所在有石渠石室延閣廣內貯之
于外府又御史中丞居殿中掌蘭臺祕書及麒麟天祿

二閣藏之于內禁後漢圖書在東觀桓帝延熹二年始置祕書監一人掌典籍圖書考合同異唐制祕書省掌經籍圖書之事祕書郎掌四部圖籍校書郎掌校讐典籍刊正文章宋有祕書監掌古今經籍圖書國史實錄天文麻數之事官有少監監丞屬有著作郎祕書郎校書正字各以其職隸於長貳明初設祕書監秩正六品先除監丞一員直長二員使掌祕書後改典籍及文淵閣中書移他所而典籍乃爲內閣辦事官失立官之意矣

春明夢餘錄

自古藏書之所非止一處漢有東觀蘭臺鴻都等處唐有祕書監集賢書院等處宋有崇文館祕書省等處我

朝稽古定制罷前代省監館閣掌書之官併其任于翰林院設典籍二員凡國家所有古今經籍圖書之在文淵閣者永樂中遣翰林院修撰陳循往南京起取本閣所貯古今一切書籍自一部至有百部以上各取一部北上餘悉封識收貯如故

湧幢小品

徐乾學文治四事疏中一條云漢武帝建藏書之策後天祿七略凡三萬三千九十卷唐貞觀中魏徵等請購天下書迄開元經史子集四庫爲卷五萬三千九百一十有五宋三館併玉宸四門殿各有書卷萬餘仁宗作崇文院一倣開元庫貯編列四部而最其日高寧之間卷幾六萬視崇文總目有加明初下求遺書之令永樂

中益廣搜採祕閣所藏不下十萬卷有奇

懋園集

按南部新書云大中中祕書之書總五萬六千六卷

漢劉向揚雄典校祕書皆在禁中謂之中書猶今言內

庫書也後漢藏書于東觀亦在禁中

六典

漢成帝河平三年上以中祕書頗散亡使謁者陳農求

遺書于天下

通鑑

後漢祕書監掌典圖書古今文字考合同異

通典

魏祕書令典尚書奏事

同上

魏明帝太和中始置著作郎隸中書省專掌國史後又

置著作佐郎亦屬中書

山堂肆考

魏黃初間既以祕書所典歸中書領之其祕書惟掌藝

文圖籍之事 詞林典故

晉孝武帝好覽文義敕著作郎徐廣料祕閣四部書凡

三萬六千卷 續晉陽秋

晉惠帝永平中詔祕書監考校古今監理圖籍 山堂肆考

晉張緒為祕書郎因求不遷欲徧觀閣內圖籍 同上

李尤為大著作于時典籍混雜尤刪除煩亂分為四部
藏之祕閣以為永制 臧榮緒晉書

晉祕書監掌三閣圖書 通典

齊祕書著作所掌與晉同 同上

梁祕書著作所掌與齊同 同上

陳祕書著作所掌與梁同 同上

陳承梁仍各設侍從文章制命典籍之職 古今圖書集成

按詞林典故云典籍之名始于此

梁任昉為祕書監自齊永元以來祕閣四部書篇卷紛
雜昉手自校讐由是篇目始定 山堂肆考

梁祕書省掌國之典籍圖書 隋書百官志

梁元帝在江陵蓄古今圖書十四萬卷將亡之夕盡焚
之隋嘉則殿有書三十七萬卷唐平王世充得其舊書
於東都浮舟泝河盡覆於砥柱貞觀開元募借繕寫兩
都各聚書四部祿山之亂尺簡不存代宗文宗時復行

搜採分藏于十二庫黃巢之亂存者蓋尠昭宗又于諸道采訪及徙雒陽蕩然無遺宣和殿太清樓龍圖閣所儲靖康蕩析之餘盡歸于燕觀此則知燕之書蓋合宋金元三朝所蓄而爲一代之書計數百萬卷縹緗之侈造物所忌也

春明夢餘錄

隋西京有書三十萬卷煬帝除其重複猥雜得正本三

萬七千餘卷納于東都修文殿

筆塵

北魏太和十一年詔祕書丞著作郎改析國記

魏書

後魏高謐有文武才除祕書郎謐以墳典殘缺奏廣訪

郡縣大加繕寫由是圖籍稍以審正

山堂肆考

後周祕書監亦領著作兼掌國史

隋書百官志

北齊祕書省典司經籍

古今圖書集成

隋祕書掌領著作太史曹事

文獻通考

唐祕書省監錄圖書

開元五年乾元殿有知書官八人分掌四庫書

唐書

開元六年祕書監馬懷素奏省中書頗散缺請選學士
整比校補從之于是搜訪遺書九年上其錄凡四萬八
千卷

唐魏徵奏引學者校定四部書自是祕府圖籍燦然畢

備 山堂肆考

唐祕書郎三人掌四部圖籍皆有三本一曰正二曰副

三曰貯 四朝志

祕書郎掌四部之圖籍分庫以藏之以甲乙丙丁爲部
目甲部爲經其類十有一乙部爲史其類十有三丙部
爲子其類十有四丁部爲集其類十有三

六典

少監掌貳書籍國史天文厯數之事

四朝志

宋直祕閣掌三館藏書

宋史

按詞林典故云宋有三館曝書之法凡三館書籍皆
祕書直閣校理等掌之每歲五月一日始至七月一
日止出三館之書與古圖書墨跡以次陳而曝之蘇
軾詩三館曝書防蠹毀是也

宋嘉定間著作郎曾從龍請嚴臣僚借書之禁紹定三
年三月詔祕書省書籍非係省官毋得借書許從監少

置簿有欲關借文籍爲檢閱校正等用卽先批簿以憑請取俟還本庫隨與點收或借出已久亦須檢舉以察隱遺從祕書監葉禾言也

居易錄

國朝承五代搶攘之後三館有書僅一萬二千卷乾德以後平諸國所得浸廣太宗御儒學下詔搜訪民間以開元四部爲目館中所闕及三百卷以上者賜與一子出身端拱元年分三館之書別爲書庫目曰祕閣眞宗咸平三年詔中外臣庶有收得三館所少書籍每納一卷及千卷判館看詳委是所少書數及卷帙別無差誤方許收納其所進書及三百卷以上量材試用與出身又令三館寫四部書二本一置禁中龍圖閣一置後苑

之太清樓以便觀覽八年癸玉宮火延燔三館焚蕪殆
徧于是出宮中本就館閣傳寫且命儒臣分類讐校校
勘校理之官始于此嘉祐五年又詔中外士庶許上所
缺書每卷文絹一匹及五百卷特與文資元豐中見祕
書省三館併歸省中書亦隨徙元祐中重寫御前書籍
又置校對黃本以館職資淺者爲之又置重修晉書局
不久皆罷去宣和初蔡攸提舉祕書省建言置補完御
前書籍所再訪天下異書以資校對以侍臣十人爲參
詳官館爲校勘又以進士白衣充檢閱者數人及年皆
命以官未畢而國家多故靖康之變諸書悉不存太上
警蹕南渡屢下搜訪之詔獻書補官者凡數人秦熺提

舉祕書省奏請命天下專委守臣又有旨錄會稽陸氏所藏書上之今中祕所藏之書亦良備矣

揮塵錄

宋靖康二年正月金人索祕書監文籍節次解發見丁特起孤臣泣血錄而洪容齋隨筆亦云宣和殿太清樓龍圖閣所儲書籍靖康蕩析之餘盡歸於燕元之平金也楊中書惟中于軍前收集伊洛諸書載送燕都及平宋王承旨構首請輦宋三館圖籍宋之實錄正史皆完書時敕平章政事太原張易兼領祕書監事有詔許京朝官假觀由是言之文淵閣藏書乃合宋金元所儲而匯于一益以明永樂間南都所運百櫃攷正統六年編定目錄凡四萬三千二百餘冊而列朝實錄寶訓不下

數千卷若永樂大典一書多至二萬二千九百三十七卷皆藏諸皇史宬不與焉縹緗之富古所未有其後典守不嚴歲久被竊萬厯三十三年內閣敕房辦事大理寺左寺副孫能傳中書舍人張萱等奉閣諭校理纂輯書目則并累朝續添書籍入焉大半殘缺校之正統目錄十僅存二三耳崇禎甲申之變散佚轉多祕本罕得欲復香廚四庫之盛憂憂其難矣

曝書亭集跋

按春明夢餘錄載永樂中命姚廣孝等重修永樂大典凡二萬二千二百一十一卷裝成一千九十五本各以韻爲類貯文淵閣副本貯皇史宬

永樂大典乃文皇命儒臣解縉等萃祕閣書分韻類

載以便檢考賜名文獻大成復以未備命姚廣孝等再修供事編輯者凡三千餘人二萬二千九百三十七卷一萬一千九十本目錄九百本貯之文樓世廟甚愛之凡有疑按韻索覽三殿災命左右趣登文樓出之夜中傳諭三四次遂得不毀又明年重錄一部貯之他所

湧幢小品

重修文獻大成書成凡二萬二千二百十一卷一萬一千九十五本更賜名永樂大典仍命膳寫刊刻以行

舊京詞林志

弘治十一年命查訪南京永樂大典遺藁奏之隆慶初以永樂大典原本送還南內按南京詹事府志永

樂元年修文獻大成則學士解縉等百十七人次年
重修永樂大典則學士王景等二千餘人五年書成
留入百人同翰林春坊修書官繕寫刊板舊京詞林
志及詹事府志

按續文獻通考云永樂五年成祖命解縉纂集古今
經史子集百工技藝爲書名文獻大成至是以爲未
備復命姚廣孝劉季篪解縉等徵四方宿儒重加增
輯計二萬二千九百卷一萬一千一百本

又按姜二酉韻石齋筆談云成祖敕儒臣纂修永樂
大典一部係湖廣王洪等編輯徵召四方文墨之士
累十餘年而就計二萬二千八百七卷一萬一千九

十五冊目錄六十卷因卷帙浩繁未遑刻板止寫原本至弘治間藏之金匱嘉靖□□年大內回祿世宗亟命那救書幸未焚敕閣臣徐文貞階復令儒臣照式摹鈔一部當時供謄寫者一百八名每人日鈔三頁自嘉靖四十一年起至隆慶元年始克告竣

按永樂大典卷數本數諸說不同宜另考

又按七修類藁云成祖命胡廣王洪等編成一書名曰永樂大典計二萬二千八百七十七卷一萬一千九十五本目錄六十卷其表文嘗見于蟬精雋中然亦不敘中之事實徒具望洋之歎而已嗚呼御覽元龜不過千卷人間亦不可得矣大典動以萬計安能

使世傳也哉

宋南渡後既建祕書省于臨安每歲七月七日館職舉
曝書之會仍有詔嚴禁祕閣書籍不許關借
中興館閣錄

金祕書監專掌書籍

古今圖書集成

元祕書監掌歷代圖籍并陰陽禁書

元史百官志

攷唐宋元藏書皆極其慎重獻書有資儲書有庫勘書
有人曝書有會至明以百萬卷祕書願責之典籍一官
守視其人皆貴生不知愛重而又設科專尙帖括四子
書易詩第宗朱子書遵蔡氏春秋用胡氏禮主陳氏愛
博者窺大全而止不敢旁及他書諸家祕省所藏土苴

視之盜竊聽之百年之後無完書矣

朱竹垞文淵閣書

目錄

永樂四年上視朝之暇御便殿閱書史問文淵閣經史子集皆備否解縉對曰經史麤備子集尙多缺上曰士人家稍有餘資尙欲積書況朝廷乎遂召禮部尙書鄭賜命擇通知典籍者四出購求遺書且曰書籍不可較值惟其所欲與之又顧縉等曰置書不難須嘗覽閱乃有益凡人積金玉亦欲遺子孫金玉之利有限書籍之利豈有窮也

成祖實錄

永樂十九年四月三殿災火勢猛烈奉天門東廡切近祕閣學士楊榮麾武士三百人將御書圖籍舁至東華

門河次是時書集淆亂無紀典籍周翰理淆亂逾二載而後復今館閣書目蓋永樂間定也

翰林記

文淵閣係中祕藏書之所明初伐燕詔大將軍收祕書監圖書典籍太常法服祭器儀衛及天文儀象地里戶口版籍既定燕詔求遺書散民間者嘉靖中閣災書移通籍庫及皇史宬

春明夢餘錄

正統六年六月少師兵部尙書兼華蓋殿大學士楊士奇行在翰林院侍講學士馬愉侍講曹鼎上言文淵閣現貯書籍有祖宗御製文集及古今經史子集之書自永樂十九年南京取來向于左順門北廊收貯未有完整書目近奉旨移貯于文淵閣東閣臣等逐一點勘編

置字號輯成文淵閣書目請用廣運之寶鈐識仍藏於
文淵閣永遠備照庶無遺失奉旨是次日於左順門用
寶訖

文淵閣書目

弘治五年大學士邱濬請每歲曝書委翰林堂上官查
驗封識上嘉納之

國朝典彙

弘治九年三月大學士徐溥以內閣書籍浩繁請以翰
林待詔潘辰管典籍事仍乞命吏部于教官內選除典
籍一員與之共事從之因以河南息縣教諭夏賚爲翰
林典籍

孝宗實錄

正德十年十一月大學士梁儲等言內閣并東閣藏書
年久殘缺必須專官管理方可次第修補誥敕房辦事

中書胡順序班劉偉俱堪委用宜令順仍舊偉改典籍
同原主事李繼先管理前項書籍從之由是其書爲繼
先所盜亡失者多矣

武宗實錄

初永樂大典書成貯之文樓及三殿災上命左右趨登
文樓出大典甲夜中諭凡三四傳是書遂得不毀嘉靖
四十一年選善書人禮部儒士程道南等百人重錄一
部命高拱張居正等校理之

世宗實錄

內閣重編書目八卷萬曆三十三年大理寺寺副孫能
傳中書舍人張萱秦焜郭安民吳大山奉內閣諭令校
理能傳等稍疏諸書大略合乎晁氏陳氏之旨今以正
統六年目錄對勘四部之書十亡其九惟地志差詳然

宋元圖經舊本並不登載著于錄者悉成弘以後所編是則內閣藏書萬厯年已不可問重編之目殆取諸刑部行人司所儲錄之以塞責耳嗚呼設一典籍掌十萬冊之書立法苟且已甚以楊士奇之得君且奉詔編書目可以言而不言其罪尙可逭哉 □□□跋重編內閣

書目

內府祕閣所藏書甚寥寥然宋人諸集十九皆宋版也書皆倒摺四周外向故雖遭蟲鼠嚙而中未損但文淵閣制既卑狹而牖復暗黑抽閱者必秉炬以登內閣老臣無暇留心及此徒付管鑰于中涓之手漸以汨沒良可歎也 五雜俎

文淵閣藏書皆宋元祕閣所遺雖不甚精然無不宋元板者因典籍多資生既不知愛重閣老亦漫不檢省往往爲人竊去今所存僅千百之一矣

鬱剛齋筆塵

明典籍之職雖曰掌四庫之書實無所事蓋太祖初置祕書監後復停罷以典籍代其職然洪武時書藏文華堂則在禁內永樂十六年遣陳循往南京取書至燕則又在文淵閣以視宋代之貯于祕書省者異矣嘗考黃佐云自正統以前翰林官退朝猶得入閣中檢所未見書至景泰中編修周洪謨輩猶然其後始爲內閣所局鑰至正德中有爲人盜竊者厥後舍人張萱作文淵閣書目已缺失不備而典籍久爲虛設矣

詞林典故

每歲曝書先期奏請委翰林堂上官一員曬晾事畢封識內外衙門因事欲有稽考者必須請旨不許擅開旨允行

春明夢餘錄

中祕書在文淵之署約二萬部餘近百萬卷刻本十三鈔本十七入直者辰入未出閣凡五楹中一楹當梁拱間豎一金龍柱宣廟常幸其地與閣臣繙閱咨詢問故置示史臣不得中立設座云然臨幸益稀至今絕嚮其書乃秦漢至寶屢購所積不得移出今不知何如聞往往有私竊而出者此係神廟初年沈疇肇太史所記乃弘治五年大學士邱濬上言我太祖高皇帝肇造之初庶務草創日不暇給首求遺書于至正丙午之秋攷是

時猶未登寶位也既平元都得其館閣祕藏而又廣購于民間沒入於罪籍一時積貯不減前代然藏蓄數多不無亂雜積歷年久不無鼠蠹經該人眾不無散失今內閣儲書有櫃書目有簿皆可查攷乞敕內閣大學士等計議量委學士并講讀以下官數員督同典籍等官撥與吏典班匠人等逐厨開將書目一一比校或有或無或全或缺所欠或多或少分爲經史子集四類及雜類書二類每類若干部部若干卷各類種類共若干要見實在的數明白開具奏報又以木刻考校年月委官名銜爲記識于每卷之末立爲案卷永遠存照竊惟天下之物雖奇珍異寶既失之皆可復得惟經集在天地

間爲人生之元氣紀往古而示來今不可一日無者無之則生人貿貿如在冥途中行已其所關係豈小小哉民庶之家遷徙不常好尙不一旣不能有所廣儲雖儲之亦不能久所賴石渠延閣之中積聚之多收藏之密扃鑰之固類聚者有掌故之官闕略者有繕寫之吏損壞者有修補之工散失者有購訪之令然後不至於泯爛散失耳前代藏書之多有至三十七萬卷者今內閣所藏不能什一數十年來在內者未聞考校在外者未聞購求臣恐數十年之後日漸消耗失今不爲整治將有後時無及之悔伏望體聖詔求遺書之心任萬世斯文在茲之責毋使後世志藝文者以書籍散失之咎歸

焉不勝千萬世儒道之幸合二說觀之是何前之少而後之多多且過三十倍豈累朝購求所積抑每部添副幾部與一切類書文集俱收入充數而然耶是惟閣大臣能考之

湧幢小品

余少觀國史經籍志史類簿錄內開文淵閣書目十四卷及備員東曹典籍編察文淵閣書止存書目三冊後有閣臣題藁無所謂十四卷而書又已損失過半崇禎十一年上命盡取閣中書籍置乾清宮御覽因命維樞校理纂釋照經史子集分部外復加十四部做讀書誌作題解以便御覽乃錄此目并錄舊書目題藁冠其首進呈後拜疏請詔搜求四方書籍奉旨允行維樞就除

禮部竟不果行簡策未與璧奎無色請求無力樞竊追
悔溺其職焉 梁維樞內閣藏書目錄題詞

內閣藏書目錄有聖製部典制部經部史部子部集部
總集部類書部金石部圖經部樂律部字學部理學部
奏疏部誌乘部傳記部技藝部雜部 內閣小識

內府司禮監書堂設翰林院官六員較書遇缺典籍具
藁呈堂題補 同上

古今通籍庫以貯古今君臣像符券典籍歲六月六日
曝之 燕史

典籍之職掌四庫書籍守局鑰以何上命 詞林典故
凡譯寫敕書番文典籍出票喚取該館教師等官 內閣

小識

淳化三年三月四日帝于崇政殿試進士詔糊名考校定其優劣爲五等第一至第二賜及第第三第四賜出身第五賜同出身五等之分自此爲始也仁宗天聖五年始曰甲則天永昌元年二月策問貢舉人于落成殿前殿試自此始

幽草軒錄

按筆塵云宋初臨軒策士本用詩賦熙寧三年用呂公著請殿試專用制策分爲五第一第二等賜進士及第第三等賜進士出身第四等賜同進士出身第五等賜同學究出身

按長編載治平四年進士合格者分爲四等一二三

等賜及第四等賜同出身大中祥符元年又有同三禮出身之目是天聖以後尙稱等也

按澠水燕談云分甲次自興國八年王世則榜始賜同出身亦自王世則榜始賜別科出身自咸平三年陳堯咨榜始

按明洪武四年太祖始策問會試中式者于奉政殿賜一甲三人進士及第二甲賜進士出身三甲賜同進士出身

舊制殿試皆有黜落臨時取旨或三人取一或二人取一或三人取二故有屢經省試取中擯棄于殿試者故張元以積忿降元昊大爲中國之患朝廷始囚其家屬

未幾復縱之于是羣臣建議歸咎于殿試黜落嘉祐二
年三月辛巳詔進士與殿試者皆不黜落迄今不改是
一叛逆之賊子爲天下後世士子無窮之利也

客中間

集

宋時中省魁者殿試有陞甲恩例前十名亦如之

夢梁

錄

進士在集英殿唱第時皇帝臨軒宰臣進一甲三名卷
子讀于御案前讀畢宰臣拆視姓名則曰某人由是閣
門承之以傳于階下衛士凡六七人皆齊聲傳其名而
呼之謂之臚傳亦謂繞殿雷

山堂肆考

按長編雍熙元年御崇政殿試進士梁灝等並唱名

賜及第此傳臚之始又大中祥符八年命金吾七驎呼之

軍頭司立殿陛下以次傳唱

按長編載大中祥符五年始印詩賦論題以賜此題目紙

之始嘉熙二年以戶部尙書趙與權吏部侍郎王極起

居郎牛大年為殿試詳定官此讀卷官之始開寶六年李昉

知貢舉徐士廉等訴昉私情取舍乃籍終場下第姓

名三百六十人召見擇一百九十五人并李昉取合

格進士十一人別試詩賦命李瑩侯陟為考官上御

殿親閱此北宋殿試之始

按澠水燕談云編排官始于景德祥符之間

殿前策士最稱重典會試後于三月十五日上陞殿百

官公服行一拜三叩頭禮畢分班立禮部引中式舉人行五拜三叩頭禮各領題在殿前對策至哺而出其題內閣擬呈先一日召中書于六科廊繕寫內瑞監之是夜司禮監鐫刻三鼓始竣仍鐫中書于內至御殿始放春明夢餘錄

殿試先期禮部具手本到閣呈中堂發西房開職事官職名彌封官七員典籍與寫榜官兩房全與先一日中堂具本請題或御製或欽命中堂代擬其本用紙實封用印印上中堂親書御前開拆進呈覽下中堂命西房官一員于中堂府內騰黃封進發司禮監刊刻刷印十五日早司禮監官捧策題頒給諸貢士畢儀制司郎中

隨送題紙至閣中堂每位一張兩房各一張是日禮部收卷封鎖典籍預撥各役于東閣伺候答應打印子紙匠一名折卷紙匠四名東閣門外傳送草榜紙匠四名內閣守門旗尉二名門官四名東閣門外答應旗尉四名門官一名東閣門南旗尉二名東閣門北旗尉二名中堂如有子姪中式具本迴避十六日黎明兩房執事官作揖各衙門執事官候中堂至東閣相見九卿詹翰堂上官讀卷提調各執事官翰林官受卷彌封掌卷監試官光祿寺尙寶司鴻臚寺供給用寶錦衣衛堂上官巡綽中堂俱送出門外禮部司屬印卷相見畢卽設卷案于東閣中堂主席面東諸閱卷九卿南北相向掌卷

官分卷送各案上閱畢定有甲第中堂及諸讀卷官將進呈十二卷各圈句讀一卷仍于每卷上貼一小票上寫擬上卷第幾及各讀卷官職名十七日早候上御文華殿宣讀畢回至東閣將頭甲三卷封起典籍輪流于各案每取一卷送中堂請批甲第名數發受掌卷翰林填寫草榜其案設于中堂座後每張一封卽發紙匠傳送西房填寫金榜填完中堂階下設條桌二張置榜于上請中堂覽畢收束送至中堂高桌上十八日四鼓西房官四員預備三傳臚帖典籍一員捧一甲三卷隨中堂至中極殿門外候東房官二員捧金榜至中極殿內置于東案上尙寶司先將合縫寶用完止留前面寶一

顥候駕出陞座各執事官入中極殿門外鴻臚寺官唱
禮行禮畢入中極殿內各執事官照序侍立中堂各執
一甲卷子手同進御前跪奏拆卷奏畢復回原侍立處
將一甲第一名卷子授拆卷官拆畢仍送中堂中堂持進
御前跪奏云第一甲第一名某人某處人奏畢起仍付
拆卷官拆卷官授付填榜官填榜中堂持第二卷第三
卷其跪奏如前儀一甲三名填完尙寶司官卽請寶用
前一顥用畢兩房官將黃榜整束完備送中堂持出皇
極殿東柱下立候皇上陞座召禮部官跪于殿內中堂
持過授之受畢出殿東門下入班行禮

內閣小識

國初讀卷用祭酒修撰等官正統中猶與其事其後非

執政大臣不得與而去取之柄則在內閣國初於殿試之明日卽傳臚揭榜今制稍寬約以三日內閱卷禮部地專而人眾庶得盡心鑒別云

登科考

中試舉人殿試內閣大學士學士等官詳定試卷次日同赴文華殿內閣官將一甲三卷以次進讀俟御筆批定出將二甲三甲姓名填寫黃榜又次日早同赴華蓋殿內閣官進至御座前以次拆卷將姓名籍貫面奏司禮監官授制敕房官填榜畢開寫傳臚帖子內閣官一員捧榜出至奉天殿授禮部尙書制敕房官將帖子授

鴻臚寺官傳臚

明會典

廷試以三月十五日而十八日傳臚二十二日謝恩賜

狀元袍服故事上皆視殿自永陵之末元嘿不出後遂以爲常至崇禎御極始照例陞殿并武舉亦如文舉傳臚至于撤御膳賜閣臣如嘉靖之壬戌隆慶之辛未萬厯之癸丑是時慈谿江陵福清三公皆受主眷最隆故有殊典不多見也 春明夢餘錄

武會試舊無廷對臚傳之例有之自明崇禎辛未科始從考官方逢年請也 香祖筆記

玉堂漫筆載宋朝故事每廷試卷前十名御藥院先以文卷奏御定高下高宗建炎間始罷之古之人亦有行之者矣今殿試第三日讀卷官例擬鼎甲三人及二甲前七名凡十卷進呈 御覽往往有改易者不盡依所

擬名第也 居易錄

國朝每科 殿試之期在三月十五日辛丑科後以三月十八日爲 萬壽節遂改 殿試于二十日至今爲例壬戌科 駕幸 盛京謁 陵改 殿試于九月二十戊辰科以 大行太皇太后升遐改會試於二月十九等日 殿試改三月二十六日云 池北偶談

文殿試大學士學士充讀卷官侍讀學士侍讀典籍中書充受卷彌封掌卷填榜官殿試前一日讀卷官大學士學士擬策問標目九條奏請 欽定其四然後讀卷官挨次串成策問進呈 御覽後中書繕寫讀卷官監看刊刻刷印次日典籍捧題紙前行讀卷之學士隨後

進太和殿學士捧置黃案上俟諸進士進門兩班排立
學士捧題紙授禮部堂官分給試畢讀卷官於內閣滿
本堂閱卷直堂供事於試卷後貼一白紙上列讀卷官
姓讀卷官于各人姓下用圈點評語作記號公選上卷
貼黃簽書擬第一至第十總封進呈十卷內凡字畫小
疵讀卷官夾一白紙片上書某字訛寫某字第幾行某
字下落去某字于傳臚前一日未時進呈 上在大內
閱畢召讀卷官進講官亦隨站班 上與讀卷官商定
甲乙大學士卽于御前小案上用硃筆填一甲三名次
序其餘二甲七名亦照欽定名次至內閣填寫其二甲
八名以後及三甲名次讀卷官先已擬定是時閣學之

與讀卷者亦用硃筆填寫甲第名次然後拆卷填榜辦

金榜漢中書八員分四員爲小金榜凡繕寫進呈標目

策問及題名黃摺名小金榜三傳黃摺乾隆十六年奉旨只用清字以上

皆小金榜司之分四員爲大金榜司寫懸掛榜文武殿

試讀卷官止四人進呈標目九條內 欽定只三條其

擬撰進呈亦同文殿試惟一甲二甲及三甲十餘名前

皆 皇上於紫觀閣較閱 欽定其餘技勇之未入選

者讀卷官始因其策之高下而先後之文武金榜填畢

清漢接扣處五鼓後同學士至乾清門用 皇帝之寶

用畢包以黃綾與讀卷之學士捧出由保和殿中和殿

至太和殿內東邊黃案上陳設俟 皇上陞殿大學士

捧至簷下

禮部

部堂官跪接捧至丹墀中雲盤內校尉舉

以出太和門俱由御道至長安門懸挂

文東武西

其小金榜

只須學士一員交奏事處恭進存大內

乾隆二十五年令讀卷官於傳臚前一日擬定十卷進

呈卽于是日帶領引 見詳覈文品始定名次

乾隆二十五年大學士來保奏請在文華殿閱卷又廷議嗣後讀卷官于 文華殿兩廊及 傳心殿前後房住宿并定于四月二十一日 殿試二十五日傳臚從前讀卷官用十四人今減爲八人內大學士二人自辛巳科始

按張位詞林典故云明殿試進士于文華殿讀卷

郊特牲曰死而諡今也古者生無爵死無諡

禮記

曲禮曰已孤暴貴不爲父作諡

同上

諡之爲言引也引烈行之迹也

白虎通

號法天也法日也日未出而明諡法地也法月也月已入有餘光

同上

周禮春官掌大喪帥瞽而厥作柩諡又太史掌小喪賜諡小史掌讀誄

諸侯薨臣子跡累其行以赴告於王王遣大臣會其葬因諡之后夫人諡臣子共於廟議之鄉大夫老死有諡者別尊卑彰有德也婦人以隨從爲義故得蒙夫之諡

考古類編

始立諡法實本成周夏商以前未聞有諡堯舜禹湯桀紂皆名號而非諡孟子曰名之曰幽厲雖孝子慈孫百世不能改也言幽厲而不言桀紂諡自周昉也同上

春秋諡有三字者衛之貞惠文子是也有生賜者衛侯之于北宮貞子析朱成子是也有出奔而仍得諡者臧文仲中行文子是也有作亂被誅而仍得諡者崔武子欒懷子是也池北偶談

按困學記聞云衛侯賜北宮喜諡曰貞子析朱成諡曰成子是人臣生而諡也魏明帝時有司奏帝制作興治爲魏烈祖是人君生而諡也

王者無上故于南郊稱天以諡之諸侯以下則天子論

行賜諡臣當受諡于君禮也若黔婁之康展禽之惠妻
諡之陶潛之靖節孟郊之貞曜友諡之王通之文中蕭
穎士之文元門人諡之諡雖當不得不謂之私尤展成
諡法考序

諡法行而其說紛紛其書見于世者有周公諡法有春
秋諡法有廣諡有今文尙書有大戴記有世本有獨斷
有劉熙之書有來輿之書有沈約之書有賀琛之書有
王彥威之書有蘇冕之書有扈蒙之書有蘇洵之書通志

按周公相嗣王以制諡法故周書有諡法一篇至杜
預取而納之釋例世遂稱春秋諡法考古類編

秦始皇既并天下追尊莊襄王爲太上皇制曰朕聞上古有諡無號中古有號死而以行爲諡如此則子議父臣議君也甚無謂朕勿取焉自今以來除諡法朕爲始皇帝後世以數計二三世至千萬世傳之無窮

編

考古類

漢興復崇舊典于是帝后皆有諡自惠帝而下皆以孝冠其上蓋可知所重矣其臣諡非宗室列侯將相大臣不得與

同上

皇后有諡起于東漢自是至于隋皆單諡光烈陰皇后明德馬皇后和熹鄧皇后文獻獨孤皇后是也

春明退

朝錄

昭烈帝蜀其諡典亦重先惟法正諡翼後則諸葛亮諡忠武以及費禕蔣琬而下不過數人而當時以爲榮

考

古類編

晉承漢魏之法爵非列侯雖有高行不得諡

同上

東晉元帝大興中詔古者皆有諡名實相稱頃來有爵乃有諡非聖賢本意通議之

同上

唐制太常博士掌凡王公以下擬諡皆跡其功德而爲之褒貶無爵稱子養德邱園聲實名著則稱先生

同上

古諡法七十二品有美焉有惡焉如何曾之醜許敬宗之謬一字之誅嚴于斧鉞其在今日獨存美諡者何蓋春秋之旨善善長而惡惡短也

尤展成諡法考序

異代追諡者則有若唐貞觀之諡比干爲忠烈元至元之諡杜甫爲文貞明洪武之諡紀信爲忠烈文天祥之爲忠節之類是也有隱逸而得諡如晉范平之稱文正梁陶弘景之稱貞白唐司馬承禎之稱貞一宋林逋之稱和靖之類是也

考古類編

唐德宗貞元十年七月賜故唐安公主諡莊穆此公主賜諡之始

香祖筆記

唐宋故事遇大臣以諡請有俞允則翰林之司篆者爲議而定二諡焉以授禮科科詳之復議而上之閣臣復衷而取上裁

王世貞諡法考序

唐宋諡議皆掌於太常博士凡於法應得諡者考其行

狀撰定謚文移文吏部考功郎中覆定之本朝雖設太常博士而不掌謚議羣臣得謚者皆出於恩賜但人臣行實九重未易周知而請乞成風有失古意請自今以後於法應謚者許其子孫具行狀進呈并稽查其歷年舉保之詞與糾劾之語參定之仍下本所學校取呈以考其鄉評復下經任地方學校取呈以驗其行實潛德尙可闡幽何必京堂三品而後錫之謚乎

羣書備考

宋歐陽修卒議欲謚文以配韓愈常秩有私憾于修增一字爲文忠議者謂必留此以待安石已而果然太常初擬朱熹謚文正考功劉彌正爲熹當繼韓愈宜特謚文詔從之厥後周程張呂諸儒皆一字此又以一字爲

重也 王漁洋諡法考序

宋黃勉夫謂本朝單諡文者惟楊大年王荆公二三人單諡正者無之然其後有程正公 湧幢小品

公卿三品以上薨其家錄行狀上尙書省請諡考功移太常禮部議定博士撰議考功審覆都省集議具上中書門下宰臣判准始錄奏聞付所司卽考錄牒以未葬前賜其家省官有異議者聽具議以聞 郤掃篇

景德以前文武官贈三品皆不得諡曾任三品官乃得諡大中祥符中命陳文僖公 鵬年 重議贈尙書節度使許定諡

元世祖至元二十二年始置諡武宗至大二年詔內外

百官三品以上者許請諡凡請諡者許其家具本官平日勲勞政績德業藝能經由所在官司保勘與本家所供相同轉申吏部考覆呈都省都省擬准令太常禮儀院驗事蹟定諡若勲戚大臣奉旨賜諡者不在此例亦一代成規

考古類編

明諡法凡皇帝十七字皇后十三字皇妃東宮東宮妃二字親王用一字郡王用二字其文武大臣亦用二字與否取自上裁若官品未高而侍從有勞或以死勤事特恩賜諡者不拘常例

同上

古諡有六家蘇洵芟其重複凡所取者一百六十八諡鄭樵又增損之爲上諡百三十一中諡十四下諡六十

五迄于明代所存者僅六十八諡今則又減于前矣 王
漁洋諡法考序

故事大臣卒禮部以諡請報俞矣則內閣以二字三請于上而自擇之是以具釋義也洪武之尙爲吳也諸功臣死事有勞而天者皆榮公侯之爵而傳之諡終高帝世文臣弗得也武臣都督弗贈侯伯不得也至建文而待制王禕得諡文節矣文臣之有諡自禕始也其諸小臣之得諡者亦自禕始永樂之制嚴矣終太宗世文臣之得諡者僅姚恭靖 廣孝 胡文穆 廣 而恭靖之爵則公也文臣之有諡僅文穆一人也洪熙初始大合故臣凡勞于國侍于青宮三品而上易名者十餘人而後文臣

之諡廣然英宣之代猶斤斤焉持其柄而弗輕予 春明

夢餘錄 又見王世貞諡法考序

婦人之有諡也自后妃而外則死節也公主之有諡也
自仁宗之悼愛女始也乳媪之有諡也自宣宗始也乳
媪之夫有諡也亦自宣宗始也方士之有諡也自世宗
始也諡而四字淫矣而使方士得之則益淫矣 春明夢
餘錄

諡法兼用美惡洪武中魯王諡荒伊王諡厲後專用美
諡 同上

明翰林官始得諡文然有不翰林而諡文者劉王二文
成是也翰林而不諡文者劉忠愍 球 是也 王漁洋諡法

考序

按春明夢餘錄云詞臣得諡文亦有不拘者劉基王守仁文成張益文僖馮京文簡姚夔文敏黃孔昭文毅周忱唐龍文襄魏驥文靜吳訥楊廉耿裕文恪儲巵文懿葉盛邵寶王鴻儒文莊鄭賜文安孫應鼂文恭何喬新文肅苗衷文康李奎文通劉宣文懿蕭維楨文昭儀智何孟春文簡王道文定顧憲成端文則不止劉王二文成也

按明史藁列傳苗衷永樂辛卯榜眼由侍讀學士入閣張益永樂乙未庶吉士由侍讀學士入閣周忱永樂甲申庶吉士進學文淵閣耿裕景泰甲戌庶吉士

改檢討本應諡文

又按春明夢餘錄云詞臣不諡文者曾棨馬愉孫賢
許彬襄敏楊鼎莊敏儀銘忠襄盛端明榮簡王文毅
愍陳文莊靖朱希周恭靖許進襄毅則又不止劉忠
愍球也

又按湧幢小品云故事凡入閣者皆用文字眾論鄙
陳文特改例諡之曰莊靖此說非也諡以易名陳文
諡文是用名也王文諡毅愍林文諡襄敏亦此意

已諡而復改者王禕文節李時勉文毅俱改忠文張王
忠顯改忠武孫忠襄靖改恭憲朱永武襄改武毅曹鼐
文襄改文忠于謙肅愍改忠肅石瑤文隱改文介張治

文隱改文毅殷士儋文通改文莊

春明夢餘錄

已謚追奪者張居正文忠吳時來忠恪李燧恭敏盛端

明榮簡

同上

大明會典載洪武議謚俱禮部奉旨施行二十五年令本部行翰林院議奏請旨又本部行吏兵二部備查實跡定爲上中下三等以行業俱優者爲上行實頗可者爲中行實無取者爲下開送翰林院擬謚請旨 本朝則歸之內閣司之典籍云 居易錄

洪武中謚法皇后太子皆二字諸公侯及夷王亦二字親王一字永樂中郡王始二字推之羣臣大約以二爲常以一爲特說者謂親王隆重如廟謚十六字歸重只

在末一字以特爲尊果爾則以後太子何以又皆二字耶總之大聖人作法後人仍之不敢改畢竟以多爲貴所謂一字王二字王者亦俗說也

春明夢餘錄

凡諡親王郡王用一字貝勒以下及文武大臣用二字
大清會典

按諡法考順治年間郡王尙諡二字至康熙初年始諡一字然康熙十年多羅郡王精濟諡懷愍多羅順誠郡王勒克德渾諡恭惠則又用二字至康熙元年追封和碩親王呼字又用惠順二字此何說也

古易名之典太常博士議之吏部考功奏行之有未允者所司駁之其重如此明掌之禮部 本朝則內閣典

籍司之每一人或八諡或六諡以上內閣閣臣擇其三
四進 呈 御覽 欽定其一 昭代紀聞

明制京官三品以上例子諡其品秩未高而侍從有年
或以死勤事者不拘成例 本朝則六卿總憲始得賜
諡侍郎得諡者無幾人然諡俱美惡上有 睿裁下有
清議亦不但以有無爲優劣也 居易錄

本朝諡法由翰林出身始得諡文閣臣雖不由翰林亦
得諡文惟鄂公 容安 由癸丑進士入詞林官至兩江總
督後死伊犁之難諡曰剛烈此蓋以節義爲重也大學
士不諡文者覺羅巴哈納諡敏壯謝陞諡清義協辦大
學士阿裏袞諡襄壯

請封乳保母奏摺查康熙十六年封乳母朴氏係照明史

實錄嘉靖封乳母劉氏字樣封爲奉聖夫人康熙三十

八年封乳母瓜爾佳氏係照永樂封乳母馮氏字樣封

爲保聖夫人康熙六十年追贈保母喀都立之母係照

宣德封保母張氏字樣封爲佑聖夫人又追贈保母懷

誠之曾祖母係照正統保母李氏字樣封爲佐聖夫人

除此四位乳母字樣不開列外原查明史實錄內尙有

封號五條開列具奏 永樂保母金氏封翊聖夫人

楊氏封衛聖夫人 正統保母藺氏封輔聖夫人 弘

治乳母田氏封安聖夫人 萬厯保母金氏封戴聖夫

人 雍正三年三月初一日奏奉 旨不用聖字學士

蔣廷錫月擬宣安夫人保衛夫人輔翊夫人順善夫人
恭勤夫人于初六日奏嬪嬪阿媽常壽之妻乳母王氏
欽定順善夫人嬪嬪阿媽李登雲之妻保母謝氏

欽定恭勤夫人

漢舊儀曰皇帝六璽皆白玉螭虎紐文曰皇帝行璽皇
帝之璽皇帝信璽天子信璽天子行璽天子之璽凡六
皇帝行璽賜諸侯王書信璽發兵徵大臣天子行璽外
國事天子之璽事天地鬼神 同話錄

答疏於王公則用皇帝行寶勞來勳賢乃用皇帝之寶
徵召臣下則用皇帝行寶答四夷書則用天子行寶撫
慰蠻夷則用天子之寶發番國兵則用天子信寶 六典

嘗見敕內閣楊學士蓋勤民之璽皇太后遺詔蓋弘德昭順之寶皇后制書蓋厚載之記詔書制諭羣臣誥命皆制誥之寶近年詔書蓋皇帝之寶云始于李學士賢救命敕諭皆救命之寶又嘗見正統中手摺印本敕諭蓋廣運之寶朝覲敕諭亦手摺印本蓋敬天勤民之寶敕則蓋廣運之寶敕今皆謂敕書蓋手敕耳惟景泰初敕諭亦蓋廣運之寶或曰以失守重造未得成故耳遣敕于外皆黃紙外封用之圖書疑是牙刻其文曰丹符出驗四方初不識出字嘗以問曾任翰林中書者皆莫能對前年議事朝下因問諸公如趙尙書榮楊侍郎鼎皆前中書翰林亦不知頃閣下辦事一小中官過趙走

扣之乃云然每事問之必不可忽也 水東日記

按陸鉞病逸漫記云尙寶司所領寶十二顆第一皇帝奉天之寶郊天齋醮用之第二尊親之寶上尊號用之第三親親之寶有大小二顆誥命之寶敕命之寶廣運之寶用之最多敕命遠去悉用一寶封識其文云丹符出驗四方

太祖初卽位有賈胡浮海以美玉至製大明傳國之寶二年製一小玉璽曰奉天執中四年置玉圖記二一日廣運之寶賜中宮一日厚載之寶又置六寶曰天子行寶天子信寶天子之寶曰皇帝行寶皇帝信寶皇帝之寶三白三青終太祖世止此未聞他寶也文皇于壬午

六月十三日乙丑入京師十七日己巳卽位十九日辛未製皇帝親親之寶二十五日丁丑製皇帝奉天之寶誥命之寶敕命之寶終文皇及洪熙以下六朝未聞增益至嘉靖十八年造御寶十一顆曰奉天承運大明天子寶曰天子信寶曰天子行寶曰皇帝信寶曰皇帝行寶曰大明受命之寶曰巡狩天下之寶曰垂訓之寶曰命德之寶曰討罪安民之寶曰敕正萬民之寶衛輝行宮火法物寶玉多毀則正統己巳土木之難正德甲戌乾清宮之災所失者必多有所失必有所補或隨事隨時添置出之內庭則史亦不得書耳今查會典御寶二十四顆舊制十七顆皇帝奉天之寶皇帝之寶皇帝行

寶皇帝信寶天子之寶天子行寶天子信寶制誥之寶
敕命之寶廣運之寶御前之寶皇帝尊親之寶皇帝親
親之寶敬天勤民之寶表章經史之寶欽文之寶丹符
出驗四方嘉靖十八年新製七顆奉天承運大明天子
之寶大明受命之寶巡狩天下之寶垂訓之寶命德之
寶討罪安民之寶敕正四方之寶蓋丹符用玉篆在舊
製十七顆之內而新製十一顆發尙寶者止七顆也然
新舊之間終與史小異亦不能深考矣

湧幢小品

中宮厚載之寶原用玉而冊立則金冊金寶龜紐朱綬
文用篆書曰皇后之寶想冊立入宮方用玉寶也皇貴
妃而下有冊無寶宣德元年以貴妃孫氏有容德諱于

皇太后製金寶賜之未幾貴妃有子旋正位中宮自是
貴妃授寶遂爲故事 同上

凡寶十四曰奉天之寶以鎮萬國祀天地曰皇帝之寶
以冊封賜勞曰皇帝信寶以徵召軍旅曰天子之寶以
祭享鬼神曰天子行寶以封賜蠻夷曰天子信寶以調
發番兵曰制誥之寶以識誥命曰敕命之寶以識敕命
曰廣運之寶以識黃選勘籍曰御前之寶以進御座從
車駕曰皇帝親親之寶以答賜宗人曰敬天勤民之寶
以訓迪有司凡奉寶用寶從寶洗寶尙寶司與印綬監
俱 春明夢餘錄

國初設符璽郎後改曰尙寶司曰奉天之寶惟祀天地

用之凡詔若赦則用皇帝之寶以冊封及賜勞則用行寶詔親王大臣調兵則用信寶冊上尊號則用尊親之寶敕諭親王則用親親之寶祀山川鬼神則用天子之寶封外藩及賜勞則用天子行寶詔外調兵則用天子信寶日誥則用誥命之寶日敕則用敕命之寶獎臣工則用廣運之寶諭來朝官員則用敬天勤民之寶凡寶之用必請命而後發焉

龍湖文集

明制各寶皆內尚寶監女官掌之遇用寶則尚寶司以揭帖赴尚寶監尚寶監請旨然後赴內司領取歲用寶三萬餘顆年終尚寶司奏進數目

西垣筆記

每年三月廿九九月廿九爲用寶之期先期請出洗滌

尚寶太監用大黃絨縹兩手恭捧挂于項尚寶卿以金盆水濯之次日乃用

玉光劍氣集

御寶共二十九顆 宮內貯六顆 皇帝奉天之寶卽

傳國璽兩 郊大祀及 聖節宮中祀天青詞用之

大清受命之寶以章 皇序 皇帝之寶以布 詔赦

天子之寶以祀百神 制誥之寶凡 制用之 敕

命之寶凡 敕用之 內庫收貯二十三顆 皇帝之

寶 皇帝行寶以頒賚賜 皇帝信寶以徵戎伍 天

子行寶以冊外蠻 天子信寶以調番卒 制誥之寶

救命之寶 廣運之寶以諭臣僚 御前之寶以肅

法駕謹封識 皇帝尊 親之寶以薦 徽號 皇帝

親親之寶以展宗盟 敬 天勤民之寶以飭覲吏

表章經史之寶以崇古訓 欽文之寶以重文教 丹

符出驗四方以識 御封證殊方 巡狩天下之寶以

從省方 垂訓之寶以揚 國憲 命德之寶以獎忠

良 奉 天法 祖親賢愛民 御書及 特書大政

要務布告等事用之 討罪安民之寶以張征伐 敕

正萬邦之寶以 誥外國 敕正萬民之寶以 誥四

方 制馭六師之寶 御駕親征行營用之 大清會典

凡給功臣世襲罔替誥命分別世次敕書該衙門開載

功績移送內閣交中書科繕寫送閣用寶仍行該衙門

給發其子孫承襲時令該衙門將原給告敕送內閣中

書科填寫承襲人名年月仍送閣用寶至大內收貯世襲官賞冊遇有改寫處該衙門先期知會次日該衙門官同學士等詣保和殿內監請出賞冊改寫畢仍請收貯大內

同上

凡御屏順治二年定御用監造送至內院內院移文吏部兵部開送內外大小文武官員職名填寫

同上

凡加上 徽號 太廟尊諡及 皇太子 皇子嘉名

妃嬪親王公主等封號諸王貝勒貝子及文武大臣

諡號俱選擬奏請 欽定

同上

凡宮殿廟宇匾額對聯陵山封號改設府州縣嘉名

敕賜督撫等牌匾俱撰擬奏請 欽定

同上

凡 恩詔詔款俱撰擬密封奏請 欽定 同上

凡 諸王貝勒文武大臣祭文照撰定成式填名給發 同上

凡 各關監督精微批但于文簿掛號鈐縫處用寶學士於午門外同該科給發 同上

凡 大將軍將軍印俱係內閣收貯如遇 命將征討大學士酌擬名號奏請 欽定如名與存貯印文相符者取給如無移文禮部另行鑄給師旅之日仍繳回內閣 同上

凡 遇 皇上陞殿日內閣官員陳設筆硯 云文房四寶 於黃

案上如遇各官謝 恩日鴻臚寺將開列謝 恩職名

啟疏陳設以備 御覽朝退收存內閣典籍廳 同上

凡紅本發科該科謄錄底簿彙成一冊爲史書錄疏其
原本年終交典籍廳收貯大庫史書錄疏交滿本堂收
貯大庫 同上

凡滿漢票簽滿漢本堂蒙古堂典籍廳每日各輪派中
書等官一員直宿 同上

凡頒賜各種 御製 御纂書籍開列名單奏請頒給
同上

凡各省慶賀表文箋文式樣俱照諸王大臣所進式由
內閣擬撰奏定頒發 同上

凡加上 尊號 徽號冊立 皇后 皇太子 皇貴

妃 貴妃 妃 嬪冊交寶文俱翰林院撰擬閣臣閱

定並寶文寶式一體進 呈會同禮工二部刊刻至填

金填青有用大學士行禮者有用學士行禮者

同上

凡新進士引 見選爲庶吉士等及庶吉士散館授爲

編修檢討等 諭旨皆硃書不用 寶加上 徽號等

諭禮部墨書用 寶傳各該堂官至內閣大學士捧

授各堂官跪接

凡各部院各督撫等隨本進 呈黃冊交典籍收存大

庫

同上

凡 皇帝上 太皇太后 皇太后奏書并進 皇太

后聖壽長至元旦一應慶賀表文及諸王大臣上 皇

太后 皇上 皇后 聖壽 萬壽 千秋長至元旦
登極一應慶賀表文箋文俱預先撰擬進 呈 御覽
然後繕寫恭進 同上

凡每年常用者爲 皇帝尊親之寶 羊脂玉方二寸餘

惟 皇上上 皇太后奏書表文用之又爲 制誥之

寶 元白玉方三寸餘 五品以上誥命用之又爲 敕命

之寶 菜玉方三寸 六品以下敕命及各敕書用之用寶

之前須知會交泰殿內監屆期同學士至乾清門東一

間正中下設用 寶黃案上設坐 寶黃案又爲 皇

帝之寶 奇南香方五寸餘 頒 詔及文武金榜用之凡

皇上行圍及駐蹕 圓明園皆隨 駕出必先一日

典籍廳知會交泰殿內監至本日攢點時典籍同學士
至乾清門通知內監內監屆期請 寶出在乾清門西
一間弓箱上開寶匣請 寶與學士看明仍安鎖匣內
典籍捧出景運門至誥敕房學士又開寶匣請 寶與
護寶之侍讀學士看明仍安鎖匣內供事用黃布包上
并用黃布帶九條週圍縛轉滿中書背而上馬至 圓
明園同學士交與內監若白 圓明園進宮則學士向
內監請 寶仍交護寶背寶官至 誥敕房開寶匣請
寶與交寶之學士看明安鎖匣內供事捧匣學士典
籍同至後左門典籍捧之而進至乾清門西一間弓箱
上通知內監內監出開寶匣請 寶與內監首領看明

安鎖匣內內監捧之而進

封印日洗寶大學士先期啟奏屆期學士典籍至乾清門通知內監內監請 寶出乾清門西一間正中下設洗寶黃案上設坐寶黃案先洗 皇帝尊親之寶次洗制誥之寶又次洗 敕命之寶其餘不洗洗寶用銀

盆向工部取用用畢交還工部凡用寶順治初內三院大學士學士公同驗用十年設尙寶官員承收十二年設尙寶司每遇用寶內院會同兩衙門官驗用十三年裁尙寶司十八年裁尙寶監專令內監承收每遇用寶內院先期知會同內監驗用康熙九年題准 駕幸南苑一應 誥敕用 寶內閣同內務府大臣在乾清門

驗用十二年題准凡 誥命 敕命 敕書用 寶不
必奏請同內務府大臣驗用如遇要務用 寶仍行奏
請 大清會典

一凡 寶錄 聖訓等書告成一呈 御覽一藏皇史
宬一貯內閣大庫

一凡各項書籍收藏內閣大庫典籍記冊以備查考
庶吉士散館向例由翰林院承辦乾隆初年大學士張
文和公兼掌翰林院事令內閣典籍兼辦後卽爲典籍
職掌矣然應散館之名單及試卷綠頭牌甲第名單翰
林院仍司之

中書典故彙紀卷三

中書典故彙紀卷四

仁和王正功輯

錢塘趙輯寧校補

儀式

丞相之尊至天子御座爲起在輿爲下體統幾莫與並矣然其於屬也雖以師保耆宿位尊望重亦與後進之士上下論議閭閻侃侃各中其度所以成其休休有容使後人知志儀式者非以隆相體正以徵相度也

丞相進天子御座爲起在輿爲下丞相有病皇帝法駕親至問疾從西門入

文獻通考

按通典註云皇帝見丞相趨謁者稱曰皇帝爲丞相
起起立乃坐贊稱曰敬謝行禮皇帝在道丞相迎謁
者稱曰皇帝爲丞相下輿下立乃升車

丞相府門無闌不設鈴鼓言其大開無節限

文獻通考

丞相有天地大變天下大過則以病聞有天地大變天
下大過皇帝使侍中持節乘白馬賜上尊酒十斛牛一
頭策告殃咎使者居半道丞相追上病使者還來白事
尙書以丞相不起病聞若丞相不勝任使者策書駕駱
馬卽時布衣步出府免爲庶人若丞相有他過使者奉
策書駕雕騄馬卽時步出府乘棧車牡馬歸田里思過
同上

丞相有疾御史大夫率百寮三日一問起居及瘳遣尙
書令若光祿大夫賜養牛上尊酒漢景帝三公病遣黃
門問病魏晉則黃門郎尤重者或侍中也 宋書百官志
凡拜三公天子臨軒六百石以上悉會直事卿贊拜御
史授印綬公三讓然後受 文獻通考

三公坐而論道

書百官志

三公之貴皆天子之所改容而禮貌之也 漢書

三公之制開黃閣廳事置鴟尾 文獻通考

按鄭元註云三公與天子禮秩相亞故黃其閣以示
謙

按漢舊儀云丞相廳事閣曰黃閣

按野客叢書云三公近于君故謂黃閣然名爲黃初
非用黃

按隋書百官志云三公府三門當中開黃閣設內屏
漢魏三公門施行馬註云禮掌舍設陛栳杜子春云陛
栳行馬也所以斷人出入栳者交互其木以爲遮欄也
山堂肆考

按職官分紀云陳後主時特詔蕭摩訶開黃閣施行
馬廳事寢堂並置鳴尾

相國丞相皆秦官金印紫綬

文獻通考

東漢官制太傅第一大將軍次之太尉次之司徒故丞
相也又次之司空故御史大夫也又次之

筆塵

漢丞相金印紫綬黃扉黑幡所以異車服于百辟也

百官志

凡三公薨皆賜東園秘器及金章紫綬章不以金以蠟為之重冥器也

後漢禮儀志

相國丞相皆袞冕綠盭綬所以殊于常公也

晉書百官志

晉成帝臨軒遣使拜三公儀注大樂宿懸于殿庭門下奏非祭祀晏享則無設樂之制太常蔡謨議曰凡敬其事則備其禮禮備則有樂今大拜輔相臨軒遣使宜有金石之樂從之

山堂肆考

晉中書監令銅印墨綬進賢兩梁冠絳朝服佩水蒼玉

乘路車江左通事舍人武冠絳朝服

文獻通考

晉初監令常同車入朝及和嶠爲令荀勗爲監嶠意抗
鄙荀巧佞以意氣加之專車而坐自此監令乃使異車
同上

晉中書舍人武冠絳朝服

同上

宋中書監令佩印綬與晉同

同上

宋孝武帝初相國丞相金章紫綬進賢三梁冠絳服佩
山元玉相國則綠蓋綬也

通志

宋中書侍郎進賢一梁冠介績絳朝服

文獻通考

凡諸尙書省文書詣中書省者密事皆以挈囊盛之封
以左丞印

隋書百官志

前代三公冊拜皆設小會所以崇宰輔之制自魏末廢
格不行至石鑒拜司徒有詔令設會遂以爲常

職官分

紀

三師品第一金章紫綬進賢三梁冠絳朝服

齊職儀

每元日與冬至大朝會百官已集而宰相方至珂傘列
燭多至五六百炬謂之火城宰相火城至則眾火皆撲
滅以避之

李肇國史補

按南部新書云每歲正旦曉漏已前宰相三司使大
金吾皆以樺燭百炬擁馬方布象城謂之火城

唐中書制誥有四封拜冊書用簡以竹爲之畫旨而施
行者曰發曰勅用黃麻紙承旨而行者曰勅牒用黃籐

紙赦書皆用絹黃紙始貞觀間或曰取其不蠹也紙以麻爲上籐次之用此爲輕重之辨學士制不由中書故獨用白麻紙而已因謂之白麻今制不復以紙爲辨號爲白麻者亦池州楮紙耳曰發曰勅蓋今手詔之類而勅牒乃尙書省牒其紙皆一等也

石林燕語

按南部新書云上元年制勅始用黃紙

凡將相告身用金花五色綾紙所司印凡吐蕃贊普書及別錄用金花五色綾紙上白檀香木真珠瑟瑟鈿函銀鑲回紇可汗新羅渤海三書及別錄並用金花五色綾紙次白檀香木瑟瑟鈿函銀鑲諸蕃軍長吐蕃宰相回紇內外宰相摩尼已下書及別錄並用五色麻紙紫

檀木鈿函銀鑲並不用印南詔及大將軍清平官書用黃麻紙出付中書奉行卻送院封函與回紇同凡畫而不行藏之函而不用者納之

李肇翰林志

凡赦書德音立后建儲大誅討免三公宰相命將曰制並用白麻紙不用印雙日起草候閣門鑰入而後進書隻日百寮立班於宣政殿樞密使引案自東上閣門出若謫宰相則付通事舍人矩步而宣之機務要速亦用雙日甚者雖休假退朝而出之

大典

按野客叢書云詔書晉時用青紙見楚王倫太子適等傳故劉禹錫詩云優詔發青紙

又按李肇翰林志云凡賜予徵召宣索處分曰詔用

白籐紙撫軍旅曰書用黃麻紙道觀薦告詞文用青紙謂之青詞凡諸陵薦告上表用白麻紙

又按唐故事中書初用黃白二麻爲綸命輕重之辨其後翰林學士專掌內命選用益重獨得用黃麻其白麻皆在北院自非國之重事如德音赦宥拜免將相之類不得用之

又按漢儀天子制詔以蘭英爲檢紫芝爲泥黃縑爲制勅也

開元五年令史官隨宰相入侍羣臣對仗奏事按貞觀之制中書門下及三品官入奏事必使諫官史官隨之有失則匡正美惡必記之諸司皆正衙奏事御史彈百

官服豸冠對仗讀彈文故大臣不得專君而小臣不得爲讒慝及許敬宗李義府用事政多私僻奏事官多俟仗下于御座前屏人密奏監察御史及待制官遠立以俟其退諫官吏官皆隨仗出仗下後事不復與聞武后以法制羣下諫官御史得以風聞言事互相彈奏於是多以險詖相傾宋璟欲復貞觀之政制自今非的須密者皆令對仗奏聞史官自依故事

通鑑

按呂氏家塾廣記云王安石在臺閣侍從時每爲上言唐太宗令諫官隨宰相入閣最切于治道後世所當遵行也及入司政事而孫莘老李公擇在諫職熟聞荆公此論遂列奏請舉行荆公不許曰是又益兩

參知政事矣

故事宰相騶哄聯數坊呵止行人鄭畋爲相勅導者止

禁百步

唐書

唐故事百寮將至宰相宅前驅不復呵

唐語林

唐中書令位在侍中上

文獻通考

中舍之設其始通掌奏事與謁者對員六朝侍從密勿與給事對員唐宋知制誥與翰林學士對員

閱史約書

唐元宗命崔琳盧從愿相先御書其名置案上會太子入侍上舉金甌覆其名而告之曰此宰相名也汝知其誰耶射中賜卮酒肅宗曰非崔琳盧從愿乎上曰然

唐書

舊制中書政事堂有門蓋宰相時適中書舍人院咨訪政事以自廣也唐常袞爲相塞絕其門以示尊大不相往來

續通典

舍人院每知制誥上事設紫褥於庭面北拜廳閣老立褥之東北隅謂之壓角長

朝野雜記

按裴廷裕正陵遺事云舍人上事宰相當壓角

按南部新書云兩省官上事日宰相臨送上事者設床坐而判三道宰相別施一床南坐四隔謂之壓角

唐制凡天子御正殿則起居郎居左舍人居右有命俯陛以聽退而書之每仗下議政事起居郎一人執筆記錄於前史官隨之若仗在紫宸內閣則夾香案分立殿

下直第二螭首和墨濡筆皆即均處 唐書

唐制兩省供奉官東西對立謂之蛾眉班 夢溪筆談

起居郎舍人掌記言動天子御正殿則俟外門廡外御
便殿則侍立行幸則從大朝則對立殿下螭首之側 續
會要

貞觀十七年定太子見三師儀迎于殿門外先拜三師
答拜每門讓于三師三師坐太子乃坐其與書前後稱

名惶恐 通鑑

唐開成中起居舍人每入閣左右史立螭頭之下宰相
奏事得以備錄宰臣既退上召左右更質證所奏是非
故開成政事詳于史氏 山堂肆考

唐開成中李石作相一日早朝中箭遂出鎮江陵自此
詔宰相坐檐子出入令金吾以三千人宿直李衛公復
相判云在具瞻之地自有國容居無事之時何勞武備
所送並停

唐語林

唐宣宗命相必擇中外有人望兩三人撚之置香案上
以物覆之焚香探丸以命草麻

唐彙要

唐故事凡拜相之後禮絕班行府縣載沙填路自私第
至於子城東街名曰沙堤

山堂肆考

按唐書李德裕拜相止京兆築沙堤

唐郊廟大禮乘輿行幸皆設幕次于御屋之側侍從親

近大臣第一

翰林志

按 國朝郊廟及巡幸于御幄之側卽設內閣帳房
大學士于此憩息焉

唐故事宰相會食百官無見者王叔文方用事來見叱
吏人白韋執誼卽就閣與語宰執輟食以待頃之吏白
二公同飯矣鄭珣瑜喟然曰尙可復居此乎

唐故事丞郎詣宰相須少間乃敢通郎官非公事不敢
謁至李德裕則御史有以事見宰相必先白臺乃聽凡
罷朝由龍尾道趨出貴戚無敢至閣者 唐書

唐故事門狀清要官見宰相皆不書前銜止曰某謹候
藩鎮入朝見宰相用公狀前具銜稱名某謹候 石林燕

語

唐宰相判四方之事有堂案處分百司有堂帖不次押
名曰花押

國史補

唐中書指揮事謂之堂帖子曾見唐人堂帖宰相簽押
格如今人之堂劄子也予及史館檢討時議密院劄子
問宣頭所起予按唐故事中書舍人職堂語詔皆寫四
本一本爲底木一本爲宣此宣爲行出耳未以名書也
晚唐樞密使自禁中受旨出付中書卽謂之宣中書錄
之卽謂之宣底今史館中尙有故宣底二卷如今之聖
語簿也梁朝初置崇政院耑行密命至後唐莊宗復樞
密使使郭崇韜安重誨爲之始分領政事不關白中書
直行下者謂之宣如中書之敕小事則發頭子擬堂帖

也至今樞密院用宣及頭子本朝樞密院亦用劄子頭

子惟給驛馬之類用之

夢溪筆談

凡公家文書之稿中書謂之草樞密謂之底三司謂之

檢今秘府有梁朝宣底二卷

春明退朝錄

白樂天為中書舍人知制誥元簡為京兆尹尚猶着綠

其詩所謂鳳閣舍人京兆尹白頭猶未脫青衫

野客叢書

書

張嘉貞開元中任中書令著緋遊藝武后時居相位著

綠

南部新書

唐省中皆青壁漢省中皆粉壁

野客叢書

唐制御史大夫與御史中丞午後三刻出回避宰相如

午前出宰相回避大夫中丞

山堂肆考

唐宰相上事日用隔品致敬坐受御史中丞吏部侍郎以下廷拜之禮自陳夷行始奏罷之按文宗時王涯爲僕射當時御史中丞宇文鼎恥爲之屈奏僕射視事四品以上官不宜獨拜涯建言與其廢禮不如避位以存舊典帝詔尙書省襍議李固言受冊官始上無不答拜而僕射亦受冊禮不得獨異雖相承爲故事然人情難安豈可不改帝不能決竟用舊儀武宗時陳夷行爲左僕射乃奏僕射視事受四品官拜無著令比自左右丞吏部侍郎御史中丞皆爲僕射下拜階下謂之隔品致敬準禮皇太子見上臺羣官先拜而後答拜以無二上

故也僕射與四品官並列朝廷不容獨優左右僕射位次三公三公上日答拜而僕射受之非是望勅有司三公上儀著令詔可至是始定夫以左右丞吏部侍郎御史中丞列拜階下而僕射巍然坐受于堂上不幾于甚乎僕嘗攷之唐初未嘗有是禮自明皇尊崇張說乃始習爲故事初非舊典說初行此時人亦驚異之或徵所從來說引聖厯間李日知豆盧欽望同日拜相用此儀其言如此初無據也

野客叢書

本朝要事對稟常事擬進入畫可然後施行謂之熟狀事速不及待報則先行下具制草奏知謂之進草熟狀白紙書宰相押字他執政具姓名進草卽黃紙書宰臣

執政皆于狀背押字堂檢宰執皆不押惟宰屬於檢背書日堂吏書名用印

夢溪筆談

開元十一年張說奏改政事堂爲中書門下其政事印亦改爲中書門下之印

通志

建中三年詔中書門下兩省置印一面

南部新書

中興後凡除拜節鉞以上多出中書進熟狀院吏云鎖中左者文臣也右選者武臣也逐房臨時呼院吏取索是以知之惟草后妃太子宰相麻則不容知

玉堂雜記

唐政事堂不接客自元載爲相中人傳詔者引升堂置榻待之及李峴爲相卽勅吏徹去

唐志

唐制宰相對正衙皆立而不奏事開延英奏事始得坐

本朝范魯公爲相雖禪代之際務從謙畏始請皆立石
林燕語

前朝宰相賜坐凡軍國大事參議之從容賜茶而退所謂坐而論道也其他事無大小一用狀擬進入上親批可其奏印以御寶謂之印書降出宰相奉行國初范質在相位自以前朝舊臣乃具劄子面取旨退各執所得旨同列連書以記之自此奏覆浸多而賜茶之禮亦寢澠水燕談

唐廢帝擇相悉書清望官貯琉璃瓶中焚香祝天以筭夾之首得盧文紀遂相之
五代史

按筆塵云唐潞王卜相以姚凱盧文紀崔居儉才行

互有優劣不能自決乃寘其名於琉璃瓶夜焚香祝
天以筭夾之

後唐長興四年劉昫入相中謝是日大祠明宗不御中
興殿而坐于端明殿昫至端明殿門閣門使曰舊禮宰
臣謝恩須于正殿通喚請俟來日趙延壽曰命相之制
下已三日中謝豈宜後時卽奏聞昫遂中謝于端明殿
庭昫自端明殿學士拜相復謝于本殿人士榮之

要

續會

宰相除授雖兼職故事皆用麻乾德二年趙韓王以門
下相兼修國史有司失于討論遂止降勅至今不能改
石林燕語

按石林燕語云宰相兼修國史止用勅不降麻世皆言自趙韓王以來失之然韓王初相時范魯公三相俱罷中書無人乃以太宗押勅則雖相亦是勅除未嘗降麻

樞密院拜罷舊皆用麻皇祐中秋武襄嶺南成功迴高文莊若訥爲使罷爲羣牧制置使武襄自副使補其缺止令舍人院草詞自是遂爲故事

石林燕語

凡宣召二府則黃門雙導上亦服窄衫宰相樞使坐高杌子執政紫團坐而低

玉堂雜記

學士以上並有朱衣引馬所服帶用黃金而無魚至入兩府則朱衣雙引金帶懸魚謂之重金故世傳館閣望

爲學士詩眼前何日赤腰下幾時黃學士望爲兩府詩
眼赤何時兩腰黃幾日重

山堂肆考

按歸田錄云宋制自學士以上賜金帶者例不佩魚
惟兩府之臣則賜佩謂之重金初太宗嘗曰玉不離
石犀不離角可貴者惟金也乃創爲金鈔之制以賜
羣臣方團毬路以賜兩府遇仙花以賜學士以上今
俗謂毬路爲笏頭遇仙花爲荔支皆失其本也

按談苑云居兩制久者則曰眼前何日赤腰下甚時
黃處內廷久者又曰服赤何時兩腰黃甚日重蓋宋
時重金最爲寵異云

錢惟演嘗語人曰吾生平不足者惟不得於黃紙上押

字蓋不能與宰相書勅也

宋史

雍熙四年御史言文德殿常朝百官皆有搏位惟參知政事未有詔令依位排砌至道元年詔參知政事與宰相分日知印押正衙其搏位先與宰相異今宜合爲一并得升都堂二年又詔自今參知政事不知印押班其搏位列宰相後不升政事堂然押勅齊衙行則並馬至今不易

朝野雜記

雍熙四年文德殿前始置參政搏位在宰相之後至道中寇萊公爲參知政事復與宰相輪日知印正衙押班其搏位遂與中書門下一班書敕齊列衙街衢並馬行宰相使相上事并有公事並升都堂及萊公罷遂詔令

宰臣押班知印參政止得輪祠祭行香正衙塲位次宰
臣之下立凡有公事並與宰臣同升都堂如宰臣使相
上事卽不得升 春明退朝錄

乾德二年始以薛居正呂餘慶參知政事止令就宣徽
使廳上視事勅尾書銜降宰相數字月俸雜給半之 會
要

凡鎖院文臣職事官承務郎釐務官通直郎以上明日
赴文德殿聽麻宰相樞密皆不往惟輪參政一員押麻
麻卷自內出閣門啟御封兩吏對展宣贊舍人南面搢
笏叉手摘首尾詞及階官姓名下數句大聲讀之不盡
宣也聽訖閣內官以授參政參政付中書吏百官不拜

而退若大詔令及冊后之類則宰相文武百官俱入
堂玉 堂玉 襟記

宰執及親王使相太尉生日天章閣排辦牲餼預申學
士院撰詔書及寫賜目一紙各請御寶詔用書詔之寶
賜日用錫賜之寶前一日差內侍持賜 同上

丁晉公馮魏公位三公侍中而未嘗冠貂蟬杜祁公相
甫百日當慶厯四年郊祠貂冠公袞又升輅奉冊改謚
諸后 春明退朝錄

十月巨賜錦襖子執政八搭罩宰相天下樂例從左帑
帑支得不以時臨期品色假爲領袖施之朝服三日而
止 揮塵錄

本朝兩省清望官尙書省郎官出入重戴祖宗時兩制亦同之王黃州謝表云臣頭有重戴身被朝章是也其後祥符天禧間兩制並徹去之非故事也

春明退朝錄

按石林燕語云旣張繖而席帽仍舊故謂之重戴

真宗朝歲時始賜飲于宰相第兩省待制以上並赴後王太尉惟用大官之膳少加堂餐自丁晉公助以家饌至今踵之

玉堂雜記

皇祐三年四月詔堂後官無得佩魚若士人選用而至提點五房方許佩魚以示別也今雖非士人選用皆佩之矣

燕翼詒謀錄

宋初殿廬幕次樞密院與中書門下同一幕趙中令末

年太祖惡其專而樞密使李崇矩乃其子婦之父故太祖特命拆之迄今不改

石林燕語

京師舊通用清涼繖大中祥符五年除親王外並禁止六年始許中書樞密院依舊用繖出入

清波雜志

狨坐不知始何時唐以前猶未施用天禧元年始定兩省五品宗室將軍以上許用狨毛煖坐今則文臣自中書舍人以上武臣節度使以上方許用而前制又不行矣

同上

晁堯民爲中書舍人范峒善風鑑謂之曰凡坐狨毛要如半睡者公在馬上精神太銜恐不久居此未幾果出

知南京

筆塵

神宗既不相潞公而相陳暘叔乃詔暘叔班潞公下潞公辭曰國朝未有樞密使班宰相上者惟曹利用嘗先王曾張知白臣忝文臣不敢亂官制力辭久之不聽乃班暘叔上已而閣門言舊制宰相壓親王親王壓使相今彥博先升之則遇大朝會親王並入亦當帶壓親王潞公復辭始許班暘叔下

石林燕語

宋熙寧七年十二月詔翰林學士知制誥至中書樞密院議事許繫鞋遇朔望及不因公事依例穿執

續會要

故事知制誥初詣省視事丞相送之施一榻堂上壓甬道而坐

湧幢小品

宋元豐中文彥博除太尉判河南至河南未交印先就

第坐以見監司既交府事見監司府官如常式或以問
彥博答曰吾未視府事三公見庶僚也既交印河南尹
見監司矣

事畧

老學庵筆記云舊制兩省中書在門下之上元豐易之
愚觀李文簡歷代宰相表中書門下班序各因其時
代宗以前中書在上憲宗以後門下在上大厯十四年
崔祐甫與楊炎皆自門下遷中書不知何時升改放翁
所記蓋未攷此

困學紀聞

元豐建中書門下省樞密院于禁中規模極雄麗其照
壁皆郭熙畫樹石

石林燕語

儀制宰臣使相出使到闕百官城外相見贊請對拜前

期差知班申如不判請不集字卽申三省及報百官元
祐元年四月文潞公以致仕官不敢依儀制有旨特許
書判字

雲麓漫鈔

本朝未定六參之制百官日俟朝於前殿者便殿初引
班常以四色官一人立垂拱門外抗聲唱前殿不坐及
宰相便殿奏事畢卽復出押百官虛拜於前殿庭下而
散其宰相遇奏事日高皆不復押亦百官以序自拜于
陛下而坐韓魏公爲相在位久遂更不押班王樂道爲
中丞力擊之以爲不臣其言雖過然當時議者猶以無
故不押班爲非禮故司馬光代樂道以辰時二刻前朝
退則押班過則免遂以爲例

石林燕語

唐起居郎舍人皆隨宰相入殿預聞奏事仗在紫宸則立殿下直第二螭頭卽其均處和墨以記事故號螭頭或曰螭均自高宗後前殿不奏事則二史固無所書矣本朝記注初不侍立但于前後殿爲次使候上殿臣僚退面問所嘗言書之然未嘗有敢告之也後始詔後殿輪日入侍崇寧初鄭丞相達夫爲史復建言併前殿皆入並立於堦殿雖存故事而奏對語畧不相聞亦不敢自書同上

宋制遇命相禁中別設彩殿召學士由內東門入繫鞋立墀下上御小帽窄衫束帶御座側獨設一繡墩小東置几陳筆硯其上侍衛者皆下學士升殿造膝受旨趨

几書所得除日進呈置袖中侍衛者皆上乃宣坐賜茶
已復庭謝御藥押送入院鎖宿如常制 玉堂賜筆視記

故事執政奏事坐論殿上太祖卽位之明日執政登殿
上曰朕目昏持文字近前執政至榻前密遣中使徹其
座執政立奏事自此始 聞見雜錄

舊制中書樞密院三司使印並塗金近制三省樞密院
印用銀爲之塗金餘皆銅鑄 夢溪筆談

百官於中書見宰相九卿而下卽省吏高聲唱一聲屈
躬趨而入宰相揖及進茶皆抗聲贊喝謂之屈揖待制
以上見則言請某官更不屈揖臨退仍進湯皆於席南
橫設百官之位升朝則坐京官以下皆立後殿引臣僚

則待制以上宣名拜舞庶官贊拜不宣名不舞蹈中書略貴者與之抗也上前則畧微者殺禮也同上

呂正獻作相及平章軍國重事時于便坐接客初惟一揖卽端坐自若雖從官亦以次起白及退復起一揖未嘗離席蓋祖宗時首輔之尊嚴如此人亦不以爲非也老學庵筆記

舊制丞相署勅皆著姓官至僕射則去姓元豐新制以僕射爲相故皆不著姓同上

唐詔敕宰相複名者皆不出姓惟單名則出姓以宰相人所共知不待書姓也余多見人告身類如此國朝宰相雖單名亦不出姓他執政則否所以異宰相之體也

石林燕語

宋學士入劄子不著姓但云臣學士某先朝盛度丁度並爲學士遂著姓以別之其後遂皆著姓

秀水閒居

紫宸垂拱常朝從官於第一重隔門下馬宰相於第二重隔門下馬自主廊步入殿門人從皆不許隨雖宰相亦自抱笏而入幕次列于外殿門內兩廡惟中丞以校椅坐於殿門後稍西北向蓋獨坐之意駕坐閣門吏自下以次于幕次簾前報班到二史舍人而上相繼進東西分立于內殿門之外南向閣門內諸司起居畢閣門吏復從上自尙書侍郎以次揖入東西相向對立於殿庭之下然後宰執自幕次徑入就位立定閣門吏復入

而北向起居畢宰執升殿尙書以次各隨其班次第相踵從上卷轉而出謂之卷班遇雨則旋傳旨拜于殿門下謂之籠門崇政殿則拜於東廊下

石林燕語

中書劄子宰相押字在上次相及參相以次向下樞密

劄子樞長押字在下副貳以次向上以此爲別

夢溪筆

談

按石林燕語云尙書省樞密院劄子體制各不同尙書年月日宰相自上先書有次相則重書共一行而左右丞于下分書別爲兩行蓋以上爲重樞密院自下先書同知以次重書于上簽書亦然蓋以下爲重而不別行

三衙內見宰執皆橫杖子文德殿後主郎階下唱喏宰
執出笏階上揖之外遇從官於通衢皆歛馬避此制久
廢惟內中橫杖子之禮迄今猶存

石林燕語

給事中中書舍人雖皆四品給事中自服緋除授告日
便自易服蓋品應得也惟中書舍人必俟後殿正謝面
賜乃易服後殿不常坐或待數日則或緋或綠猶仍其
舊服祖宗時知制誥皆然而亦有不賜者李憲成公自
知制誥出守荆南尙服緋以學士召還乃賜紫而後服
金帶是也

同上

徽宗時霍端友爲中書舍人服金紫故事惟服黑角帶
帝顧見之曰給事舍人等耳而服色相絕如此始命犀

帶佩魚

四朝國史

中書四

按燕翼詒謀錄云霍端友爲中書舍人徽宗願其帶問云何以無別于庶官端友奏非金玉無用紅鞓者乃詔四品從官改服紅鞓黑犀帶佩金魚

按石林燕語云宰相罷免雖散官並依舊服笏帶前執政官到闕止繫遇仙花帶

石子惠云中書舍人繫紅鞓犀帶白葉少蘊始有舊假服色不佩魚後王照請于朝方佩

西溪叢語

太宗命製毬路笏帶賜輔臣後雖罷免亦服焉趙文定罷參知政事頃之除景靈宮副使賜以御仙帶自後罷宰相仍服笏帶罷參樞皆止服御仙帶

春明退朝錄

太宗命創方員毬路帶亦名笏頭帶以賜二府文臣

同上

職事官差除皆除目先下惟中書舍人宰相得旨朝廷遣直省官召詣都堂面傳旨召試被命者致詞丞相謝之直省官徑引入中書省前期侍郎廳設幕次几案于中就省少頃本省吏房主首持丞相封題目來卽就試中書具食罷侍郎致茶果是日宰相住省俟納試卷始上馬翌日進呈除命方下蓋召試之制也有思遲不卽就者往往過期或爲留內門然已不稱職矣嘉祐間有試而不除改天章閣待制者

同上

宋內制名色不一倣直時或未詳其體式故凡詞頭之

下院吏必以片紙錄舊作于前謂之屏風兒

玉堂襍記

宋學士及舍人院最重題名學士舍人赴職之日本院設具以是日題名于石玉冊官刊字後有拜宰相者卽其名下刊相字其家遣子弟齋宴具就本院召學士待制以上皆集最爲盛禮

翰苑遺事

宋衣冠故事多無著令但相承爲例如學士舍人躡履見丞相往還用平狀扣階乘馬之類皆用故事也近歲多用鞞簡

夢溪筆談

宋翰林學士居深嚴之地職任事體與外司不同至于謁見相府自非朔望慶弔止公服繫鞋而已學士于內庭出入或典詔亦不具鞞簡若同列齊行前此命朱衣

吏雙引抗聲言學士來直至宮門方止歸院則朱衣遞
聲呼學士來者數四故事學士敘班只在宰相後今之
參知政事班卽舊日之學士立班也

續翰林志

紹興初詔中書門下兩省已併爲中書門下省其兩省
合送給舍文字今後更不分送並送給事中中書舍人
文獻通考

宋百官申中書皆用狀惟學士院用諮報其實如劄子
亦不出名但當直學士一人押字而已

歸田錄

王禹偁言宰相樞密不得于本廳見客許于都堂延接
以杜私請王沔喜卽奏行之司諫謝泌以爲如此則是
疑大臣以私也疏駁之帝追還前詔

按澠水燕談云王元之嘗言宰相于政事堂樞密于都堂同時見客不許本廳私接議者以爲是疑大臣以私也遂寢或以元之所乞爲當但難其率宰相于政事堂並見耳其後二府于朝退時聚廳見客以杜請託

按宋史云宋仁宗詔中書樞密非聚廳無見賓客

宋朝殿日皇太子宰相親王使相參政各有朱衣吏二人自下馬處前導至殿門此外惟翰林學士有之又于禁門內許以茶鐐擔子自隨與執政等

金坡遺事

丁謂自保信軍節度使知江寧參知政事以當降麻盛文肅爲學士以爲參知政事合用舍人草制遂以制降

丁甚銜之

倦遊錄

舊制執政除罷皆宣麻獨呂惠穆公

公弼

因爭新法求

去王安石陰阻之乃使舍人院命詞蔡齊時掌外制乃
繳詞頭舉故典論之

山堂肆考

舊法宰執初除及轉廳皆有給使減半其後用例浸失
初意宋程大昌請自侍從而執政執政而宰相則爲初
除法當與全餘爲轉廳皆減半

山堂肆考

館職初除故事皆行啟徧謝內外從官以上從官雖中
書舍人亦如之蓋惟此兩職試而後除與直拜命者異
故其禮亦殊近年中書舍人行啟但及現任執政而不
及外館職雖在內從官亦有不及者矣

石林燕語

唐制宰相生日百官通班致賀降階答拜今金朝宰執生日分六品以下別爲一班揖賀左右司郎中五品官廷揖咸坐答之後下尙書省議用立答

金史

中書令右丞相左丞相俱銀印

元史

世祖至元五年詔許衡等考定官制並集公卿議省院臺行移之體衡曰中書佐天子總國政院臺宜具呈時商挺在樞密高鳴在臺皆不樂欲定爲咨稟因大言以動之曰臺院皆宗親大臣若一忤禍且不測衡曰吾論國制耳何與于人相質于帝前帝曰朕意亦與衡合其制遂定

續文獻通考

元中書令銀印

明洪武三年定大朝會賜宴上殿者賜坐墩其退朝燕
間行幸之處勳舊之臣文學之官賜坐者仍加絨罽繡
褥永樂以後御三殿或便殿行幸無不賜坐者

翰林記

明洪武中學士遇公侯引馬卻避二品引稍側三品分
道而行永樂以後本院雖六品以下官惟前輩在內閣
官尊者引馬側立餘舉手而已成化中有史官遇尙書
爲所呵內閣聞而讓之謝過乃已蓋院職雖卑而倚任
則重與公卿抗禮自太宗時始也

同上

殿閣大學士雖設自洪武中然同在內閣視事則自永
樂年始其坐次不敢正席者以車駕所常臨幸故也

同上

自來天子升殿漢以羽林期門唐以三衛皆執扇登殿
唐元宗時閭則先奏以三衛皆趨悍武夫不宜升陛邇
御座請以宦者代遂爲故事至今用之然國朝以勳戚
大臣閣臣詞臣尙寶中書科道夾侍而道引升陛則詞
臣中書科道各四人其制最當至女官隨侍女樂引道
必起于呂武臨朝而唐元宗襲爲故事至我太祖革去
亦足洗千古之陋

湧幢小品

永樂初令內閣儒臣侍朝立金臺東御三殿皆陞殿賜
讌正統初內閣官始移下貼御道東序立本院官則序
立丹墀之東第一班後御西角門亦如之若午朝晚朝
之儀洪武時無可攷者永樂中午朝御左順門旣陞御

座內官設案內閣及本院官俱于案西序立晚朝或御
右順門儀節亦如之

翰林記

永樂初內閣官遇常朝立金臺東錦衣衛在西後因不
便移下貼御道東西對立後因雨各衙門俱上奉天門
奏事五府立西簷柱外六卿序立東簷柱內內閣遂無
地可立景泰二年秋以戶部尙書兼學士陳循奏始令
常朝內閣學士與錦衣衛官東西對立

明典故紀聞

景泰中陳芳洲奏定常朝大學士與錦衣衛官對立經
筵立尙書都御史之上

湧幢小品

殿閣大學士自相兼者如陳循以華蓋兼文淵高穀王
文以謹身兼東閣胡廣楊榮金幼孜以文淵兼翰林院

學士其內閣諸殿次第自正統間始定其兼銜次第自天順間始定然或以所兼保傅爲等級或以部分爲先後楊榮以太子少傅謹身位少保黃淮武英下陳山無兼官以謹身位少保黃淮太子少保金幼孜武英下少保黃淮太子少保金幼孜以戶部尙書位少傅兵部楊士奇下金幼孜又以戶部楊溥無兼官以禮部位工部楊榮下王文以少保吏部位戶部陳循工部高穀少保太子太傅下皆取所兼保傅爲次序也張瑛以禮部華蓋位戶部謹身陳山下此則以部分爲次序也

春明夢餘錄

永樂中北征還大宴羣臣第功時大學士楊榮金幼孜

以五品官特與兵部尙書方賓同列而坐嘉靖中恩榮
宴於禮部讀卷官少詹事兼學士李本秩第四品以內
閣故奉旨班尙書末萬厯初內閣吏侍申時行亦班坐
尙書末循本例也 弇州異典述

永樂四年解縉罷黃文簡 淮以右坊學居首越二歲而

庶子胡文穆以學士俱在坊淮遂居次十六年楊文敏

榮以文淵閣學居首二十二年楊文貞爲華蓋榮遂以

謹身居次正德九年梁文康 儲居首累遷至華蓋十三

年故相楊文忠 延和復入銜位同而入閣在前儲遂居

次嘉靖二十三年分宜居首累遷至謹身二十五年夏

文愍以華蓋復入嵩遂居次 同上

中書
明內閣大學士皆于翰林院上任故院中設閣老公座于上而掌院學士反居其旁諸學士稱閣老曰中堂以此後遂相沿勿改 池北偶談

按殿閣詞林記載翰林院正堂三間中設大學士侍讀學士侍講學士公座而不言學士公座

按續通考載明正統七年翰林院署落成掌院事學士錢習禮不設西楊南楊公座曰此非三公府也至期二楊以聞乃命工部具椅案禮部尙書胡濙定位次左設大學士三座學士一座而講讀學士東西對列

崇禎元年輔臣施鳳來等以枚卜請上允之吏部會推

十員翌日召閣臣與吏科河南道至乾清宮前殿上諭
輔臣曰內閣公孤大臣倘得其人社稷之福朕不敢自
定欲求之天施鳳來對曰海內多事皇上多點數員上
領之命內臣設香案上舉香一拜三叩隨設小桌置筆
硯于香案之左前出紅紙十方各書一名爲闈入金瓶
內上舉匙拈之每拈一闈遍示侍臣然後舉筆點之再
拈如前共點錢龍錫來宗道楊景辰李標劉鴻訓周道
登六人上復拜叩禮畢還御座侍臣趨入叩頭謝

春明
夢餘錄

翰林于內閣不稱屬屬吏則兩房中書凡經筵纂修諸
務咸有職司而典籍爲之長每朝罷詣閣部堂坊局史

官以次爲一班中書綴史官後亦一班官雖冗長其視他曹有仙凡之隔焉蓋國家二百餘年備員禁近離立清班所以深嚴政地優崇館閣其意如此

錢牧齋內閣小識跋

奉天殿每遇正旦冬至聖節則御焉導駕六科給事中十員殿內侍班翰林官四員中書官四員導駕官立于殿內柱下東西相向侍班翰林院立于東導駕官之後中書立于西導駕官之後

春明夢餘錄

中書舍人每大朝會則擬四員與翰林史官上殿東西班對立凡東宮節令相賀定擬二員文華殿導駕侍班與翰林宮坊尙寶司六科同爲侍從之臣諸司無相並

者其地勢至清遠也

續文獻通考

國朝凡頒詔赦閣老先期視草繕正至日早閣老預約左掖門內官先放入于內閣取詔捧立于殿上寶案之北俟禮部尙書請頒詔乃稍南移數步俯授之尙書則跪受以出

瑣綴錄

頒給誥命吏部引奏如常儀候駕回鴻臚寺設案于橋南領誥勅官俱于御路西侍立聽唱名中堂上御路跪頂捧起一躬過東授典籍典籍恭捧先行送至中堂案上遇免朝會極門行禮

內閣小識

翰林官誥勅官例當捧勅俟上御門視朝陞座內閣門官以勅授管誥勅官卽隨輔臣登御階循廊從弘政門

至金臺東輔臣立御幄旁咫尺誥勅官立輔臣稍後尺許俟領勅官過卽轉北向上拱立俟領勅官自陳某官奉差某處領勅有旨曰與他勅去卽向北鞠躬受勅一躬而退制始於嘉靖七年春明夢餘錄

中堂一位謝恩各位俱陪其謝胙及遣祭分獻會極門行禮不陪內閣小識

文淵閣本翰林內署非衙門名故朝廷之宣召諸司之文移雖事關機務亦止稱翰林院或稱會同翰林堂上官初不以內閣名瑣綴錄

按明史職官志云嘉隆以前文移關白猶稱翰林院以後則竟稱內閣矣

文淵閣印銀鑄方一寸七分厚六分其文玉箸篆也各衙門印皆用於行移中獨內閣印惟機密文字鈐封進呈至御前開拆始用之

翰林記

按春明夢餘錄云閣中有文淵閣印章玉箸篆凡封進詔草題奏揭帖用之不得下諸司卽下諸司以翰林院印行諸司行內閣亦止稱翰林院又云上有密旨則用御前之寶封示下有章疏則用文淵閣印封進直至御前開拆

明翰林官常朝畢立東閣前俟大學士至閣中講讀史官皆序立園揖而退五經博士而下揖於閣外出復序立于史館前亦園揖揖畢各書公會乃入館修書史

翰

林記

明翰林官入見內閣必先使孔目通姓名而後見初入官謝恩後入見例留飯其後內閣官尊遂令六品以下揖于階下五品及詹事府官送迎如僚友禮

同上

明左右春坊中允入閣門內揖出用雙導左右贊善從六品亦然而翰林侍讀侍講品故同中允然以本院屬官故揖則中庭出則單導

觚不觚錄

明翰林院朝房在午門外第六區每候朝則殿閣大學士皆在焉鼓初嚴各詣左掖棕蓬下序坐俟鼓終嚴而入

翰林記

按瑣綴錄云翰林直房在右闕門之南每早未朝時

諸閣老分坐于北楹俟門吏報三鼓乃俱赴左掖門
御史北向立于中書之南

凡年節冬節中堂至閣先拜先師行四拜禮兩房隨拜
次中堂交賀行兩拜禮次兩房官拜賀中堂行兩拜禮
次翰林院詹事府堂上并坊局等官翰林院侍讀等官
庶吉士同進同拜先師畢侍立階下候詹翰堂上等官
拜賀中堂行兩拜禮畢送出侍讀等官拜賀中堂行兩
拜禮次庶吉士行兩拜禮四夷館提督行兩拜禮其餘
各官俱免拜揖賀如常儀次六科尙寶司鴻臚寺中書
舍人進見中堂俱下階答禮

內閣小識

京官路避儀式百年以來俱無遵守自余舉進士時六

卿見內閣則避吏部尙書遇內閣下輿揖余後二十年入爲太僕則聞吏部尙書久已避內閣不敢抗揖而諸侍郎副僉都御史通大之長皆避吏部尙書矣內臣出行雖奉御火者單騎與公侯內閣分道而馳矣下陵上替深可歎也

王弇州史料

大明會典官員隔一品避馬隔三品跪惟法從不然今諸寺大卿皆三品也乃避尙書侍郎公侯勛臣在一品之上乃避內閣六卿二品避內閣亞卿三品避太宰文官八九品者而亦與公侯抗禮道上不避

筆塵

明舊例五部尙書避大學士惟吏部尙書不避相遇則下輿而揖今吏部亦與五部尙書同矣

香祖筆記

翰林庶常以至內閣中書舍人遇尙書都御史亦分途
抗行 同上

六部尙書侍郎大小九卿于內閣用雙帖報之以單紅
王弇州史料

正統以來諸學士與閣老每早朝退俱入東閣圓揖畢
講讀以下官序立閣門內中書等官雖進四品以上秩
者亦從眾序于閣門外總揖諸學士與閣老乃散天順
初徐有貞驟進大位欲示私恩乃聽西勅房中書等官
請另揖于文淵閣下不復從眾行禮惟東誥勅房中書
等官尙仍舊制尾大不掉其有自哉 瑣綴錄

宣德以前內閣與外九卿爲平交至宣德後三楊眷重

漸柄朝政矣 春明夢餘錄

王忠肅公 翱嘗至東閣議事有從行主事與左順門內

豎嬉笑公望見呼之曰曾讀論語鄉黨篇乎過位色勃如也此地近奉天門御榻豈臣下談笑處耶乃知前輩讀書力行如此 四友齋叢說

宋經筵講官舊皆坐乾興後始立蓋神宗時年尙幼坐講不相聞故起立欲其近爾後遂爲故事今講讀官初入皆坐賜茶惟當講官起就案立講畢復就坐賜湯而退侍讀亦如之蓋乾興之制也 石林燕語

經筵侍班各官皆補服講官則兼服蟒領袖袍與他異 詞林典故

知經筵官俱綠金緋袍

明會典

經筵初開有白金文綺之賜故有經筵頭之諺

震澤長

語

武定侯郭勛以太保知經筵事立東班首西班則內閣

一人獨立最近御座

湧幢小品

正德以來經筵每日講畢上必曰先生喫酒飯閣老與
四講官皆承旨叩頭乃退成化丙戌劉主靜入閣遽託
中貴言今後酒飯只以常例賜毋煩玉音自是儼然而
進默然而退君臣之間舍此無一語接而先生之稱亦
不復聞

瑣綴錄

宰輔罷歸命勅馳傳行人護行月廩歲夫如制

明史稿

景泰元年九月初令九卿內閣相移文書名內閣移司

屬書孔目名

憲章類編

景泰三年上以先師像祀于中座中堂遂不敢南面中堂加恩轉官廷謝拜先師其餘庭謝不拜正旦冬至及每月朔望拜春秋廟祀先一日出閣時具香燭行四拜

禮

內閣小識

內閣不設公座惟東西二杌相對耳正德初劉瑾權重西涯欲尊之特設一榻於杌之上亦不敢正也故事太監至迎之止花臺送之止中門余初入內閣西涯以是告曰此定例也余等守之惟謹是後不知何如矣

震澤

長語

東白先生張吏侍廷祥云自余登朝而內閣待中官之

禮幾變天順間李文達賢爲首相司禮監以議事至者

便服接見之事畢揖之而退後彭文憲時繼之門者來

報必衣冠見之與之分別而坐閣老面西中官面東中

官第一人位對閣老第三人常虛其上二位後陳閣老

文則送之出閣後商文毅輅又送之下階後萬閣老安

又送至內閣門矣今凡調旨議事則掌司禮者間出其

餘使少監并用事者傳命而已金臺紀聞

內閣五品時不過文淵翰林諸學士庶子中允爲序耳

其諸殿次序自正統時定兼部銜次第自天順始定弁

州異典述

成化十四年十一月己未萬壽聖節始令翰林官習儀先是翰林院官僚自永樂宣德以來相傳免習儀至是錦衣衛緝事官校奏學士王獻檢討張泰不赴習儀上命鞠問之獻泰舉相傳之例以聞宥之仍詔自今行大禮先期習儀內閣辦事者免其餘習儀如常

館閣漫錄

中書周令溫州人嘗言成化年間授職彼時中書與閣下如同僚然投刺俱平交蓋宣德以前本一堂相處今之西房卽文淵閣也閣臣居中中書居東西兩房各辦其事已徹內庫十間以西五間居閣下謂之文淵閣以東五間藏書籍而東房中書亦遷居之故今以閣下稱中堂而東西非房矣猶稱兩房者沿舊名也凡閣下到

任尙之兩房答揖若六部之於各司無是體也

識餘錄

李公

賢

以吏部入閣欲設公座於文淵閣余曰不可聞

宣德初聖駕在此坐舊不設公座得非以此耶李曰事
久矣又何傷予曰此係內府亦不宜南面坐李曰東邊
會食處各異方卻正坐何也予曰此有牌扁故爲正彼
皆無扁故也李曰東閣有扁亦正坐予曰東閣面西非
正南也李詞氣稍不平曰假令爲文淵閣大學士豈不
正坐乎有居是官而不正其位乎予曰正位在外則可
在內則不可如欲正位則武英謹身諸殿大學士將何
如耶原設官之意止可侍坐備顧問而已李語塞

彭文

憲公筆記

中堂新任典籍先期稟堂派撰文中書撰啟呈送中堂覽改發寫先一日典籍詣宅恭送至期東房官一員恭送邀帖早朝謝恩畢進東閣少坐待中堂至閣典籍詣東閣請上任兩房官於閣門外迎候老先生行至堂前中堂老先生下階讓入中堂拜先師孔子行四拜禮中堂老先生行兩拜禮兩房官行兩拜禮翰林詹事府堂上并坊局等官同進中堂先揖先師孔子隨行兩拜禮翰林院侍讀等官階下行兩拜禮翰林院庶吉士階下行兩拜禮翰林院詹事府首領等官階下行禮四夷館提督檻外行兩拜禮四夷館教師等官行禮四夷館譯字官行禮四夷館譯字生行兩跪禮史館評事等官行

禮史館譯字官行禮史館生儒行兩跪禮翰林院秀才
行兩跪禮六科尙寶司鴻臚寺中書舍人進見俱下階
答禮畢老先生至兩房答禮兩房官候老先生回中堂
復詣中堂謝揖而退典籍行內府司設監送鋪陳至閣
及文華殿直房中堂加官上任俱設公宴合屬稱賀畢
請畫公會六科尙寶司鴻臚寺中書舍人進揖其餘加
恩及初賜服色并謁陵回止合屬官揖如堂儀

內閣小
識

國初朝儀專敘品級不分散要世宗自甲午以後三十
餘年不常朝舊典無人記憶穆考登極始復常朝鴻臚
搜求故實多所散失不知于世廟初年合否班行東西

分立勳臣在西上東面不與百官齒左班面西侍立一品二品爲第一行三品次之爲第二四品五品京堂次之爲第三宮坊五品六品次之爲第四翰林六品七品次之爲第五兩房中書次之爲第六此爲一段其下則六科爲第一吏部第二中書舍人第三此爲一段其下則御史第一五部次之自此以下品級官次紊不可紀矣右班面東侍立則錦衣衛在前五軍都督府次之其後七十二衛指揮等官叩頭禮畢則左班內閣右班錦衣俱由玉陛升立金臺左右六科升立甬道左右東西向御史立于甬道左右北向其北面行禮班次則公侯駙馬伯列三班于前去文武階次稍遠其下則文武兩

班同上御道左右分立一品二品爲第一三品第二四品五品京堂至翰林史官吉士第三科道中書第四其下則六部郎官亦頗紊亂其同班序立翰林七品在小九卿六品之上宮坊六品在小九卿五品之上宮坊五品在大九卿五品之上講讀學士在大九卿四品之上惟讓僉都少詹光學士在僉都之上至于六部郎官往時一吏二禮其下則戶兵等部故有主事立于郎官之上者其後戶部主事賀邦泰以禮部在其上嘗上疏爭之有詔六部郎中並立員外次之主事又次之久之又稍稍紊矣

穀城山房筆塵

明學士在朝失儀不面糾

明詞林典故

內閣密勿之地洩漏之禁甚嚴欽奉聖旨懸掛閣門一應官員閑雜人等不許擅入講筵侍直及纂修處所俱係禁地凡供事各官不得多帶從人特置木牌關防出入分給定數開列于後

內閣小識

中字號牌三十面 中堂每位下四面如多幾位照數增給

制字號牌二十五面 掌房官二員每員下一面典籍官二員每員下二面各官每員下一面

誥字號牌二十五面 各官每員下一面

供字號牌九十七面 門官精微吏旗尉紙匠尉役班匠每名給一面

經字號牌六面

經筵講官每員下二面

史字號牌三十面

侍直官每員下二面

副字號牌二十面

副總裁每位下四面

史字號牌八十面

纂修官每員下二面如日講官加

牌一面

史字號牌四十六面

膳錄官生每名下一面

史字號牌十面

圖書監生每名下一面

史字號牌三十一面

當該每名一面

史字號牌四十四面

貼寫吏每名一面

館字號牌三十面

庶吉士考試每員下一面試畢卽

繳

皇子每遇出講則從皇極門之左弘政門出紅板橋用校尉八人青羅小傘二柄與至尊同而隨侍內瑞六人皆金帶也至皇極門下輿趨過西復上輿至書堂陛下出輿閣臣率講讀侍書官立于門右一躬候王入書堂至先師前行禮畢出坐堂中王命先生每來一躬卽分班入門內閣臣左立餘各官稍退分左右立一躬出班初開館行四拜禮以後行一拜禮不叩頭也讀四書書經各五遍講四書書經各二遍王命先生每喫酒飯卽出用酒飯畢再入侍王寫倣閣臣至案前環觀王親寫十字餘俟諸臣退後寫足送閣閣中批圈畢進呈

春明

夢餘錄

交際儀注 六部尙書左右都御史往回俱侍生帖正
坐送轎俱避轎稱某老爺南京同六部侍郎副都御史
通政使大理寺卿受侍教生帖回侍生帖偏坐送轎俱
避轎稱某老爺太常卿太僕卿光祿卿順天府尹僉都
受晚生帖回侍生帖偏坐隨行送轎馬俱避轎稱某爺
左右通政大理通政太常太僕光祿各少卿通參理丞
尙寶卿少卿府丞受晚生全帖還侍生單帖旁坐隨行
送馬俱避轎稱某爺鴻臚卿受晚生帖加三品回侍生
全帖四品回單帖旁坐隨行送馬少卿並各寺寺丞司
丞回送知生單帖不看馬翰詹照典故七科以下受晚
生帖回侍生單帖旁坐餘俱往回侍生安正坐內有對

房取士受門生帖門下晚生帖俱回侍生帖看上轎馬
三品以上稱某爺少詹以下俱稱某老爹編檢帖仍論
科俱安旁坐六科給事中受晚生帖回知生單帖旁坐
隨行看馬稱某老爹十三道御史受官銜晚生回友生
單帖旁坐隨行看馬稱某老爹如考選在入閣以後受
官銜門下晚生初次拜不看馬差出御史俱用官銜手
本各部司官中行評博治中欽天監太醫院俱官銜門
下晚學生受全帖送友生單帖旁坐隨行不看馬稱某
老爹惟文選司郎中回知生單帖各省總撫帶尙書銜
者侍教生帖侍郎銜者晚生帖副僉都俱官銜晚生帖
回侍生帖各省左右布政使按察使受官銜晚學生手

本回侍生單帖旁坐隨行不看馬參政參議副使僉事
知府等俱受官銜晚生手本回知生單帖各州縣正儒
學官俱受腳色手本送友生單帖俱旁坐隨行不看馬
稱某老爹一品至四品面呼老先生以下呼公或掌科
道長巡撫書封稱某省巡撫某爺巡按稱某省巡按某
老爹各司道府州縣俱列地方官銜稱某老爹本治公
祖父母治生帖隣治俱隣治生帖公侯駙馬伯戚畹俱
通家侍生帖正坐錦衣衛堂上俱受晚生帖回通家侍
生帖旁坐送轎馬俱避轎勳衛三直管事回通生單帖
旁坐不看馬加都督銜者看馬俱避馬五品帶銜僉書
回侍生單帖偏坐看馬南北司掌印等官回通家生單

帖或知生單帖旁坐不看馬巡捕提督六副將各鎮總兵俱投官銜手本回知生單帖旁坐不看馬加都督銜者看馬

內閣小識

閣臣投刺兩衙門故事俱用友生後有易知生者掌科劉戴源爲沈同和事參及座主并爭知生字云晚以別尊卑之分知以通往來之常

黃忠端公集

親王體至尊于文武大臣不稱名自分宜當國而親王無不稱名矣至江陵而無不稱晚生矣當其時襲封者至稱門生

香祖筆記

明季閣臣被命卽投刺司禮大奄兼致儀狀文震孟獨否司禮者曹化淳故王安從奄雅慕震孟令安從子官

中書者屬震孟鄉人述意卒不往

明史稿

凡御門講官四人爲前一行編檢四人爲後一行在科道上先于西階下東向立俟上陞座講官卽升階去御座丈許東向立御榻下向南設金猊爐二內侍先爇香其中上陞座香煙從金猊口中出講官末一人立處正與金猊相值各部院官以次奏本畢內閣侍讀學士就黃案捧本匣退侍衛俱降階階下編檢科道俱退大學士學士升自東階啟奏拆本時講官卽移近前二尺許立聽

玉音竢紀載大學士學士退講官亦退

詞林

典故

御門聽政冬春辰初二刻夏秋辰正三刻內閣部院官

率以昧爽齊集午門次至中左門稍憩乃入候于乾清門外 駕出陞 御座六部都察院等衙門以次奏事如初一日首吏部則初二日首戶部周而復始若宗人府奏事則恆居部院之首三法司例居第三部院奏事畢然後臺省官奏事既畢然後內閣大學士學士至御前承 旨翰詹起居注滿漢各員輪直立西楹下 居易錄

按春明夢餘錄云御門非古制也古制天子居總章明堂惟閏月則居門故閏字從王從門也

己卯熊青嶽太宰拜相時宛平胥庭王公爲首揆沁州吳公桐川次之而孝感乃故相再入內閣或疑其位次

王公云若熊公徑以大學士召還自當爲首揆今以禮書召遷吏書而大拜是由尙書大拜非以大學士召還也不當讓熊遂次吳而桐城張公敦復又次熊及王公引疾則丹徒張公素存爲首揆桐城請告歸矣熊乃王教習門生也

香祖筆記

中堂大拜後其行走前後由內閣請旨閣學則以進衙門之先後爲坐次

內閣大學士擬票而不票紅票紅乃學士之職故大學士無硃筆卽相府封條判日亦用墨筆

凡中堂閣學及票本之侍讀中書案上皆貼白紙一方防黏汙本章也

凡秋讞三覆奏訖 上在乾清宮御懋勤殿勾到圓明園御洞明堂勾到 上皆東向坐閣臣及刑部堂上官講官並南向 詞林典故

康熙丁丑冬有 旨三品以上朝官年及六十許乘肩輿入東西華門至闕門蓋 聖朝優老之意先是百官皆由長安門出入惟內閣由東華門然亦必易馬始得入滿州閣部大臣皆騎無肩輿者自是亦多乘肩輿矣 居易錄

按東西華門當是東西安門若入東西華門則非至闕門矣

凡除授大學士未赴閣先于翰林院受任是日大學士

具公服詣 先師行禮三跪九叩頭詣昌黎祠一跪三叩頭禮畢至寶善亭更衣出坐大堂翰詹官以次進揖大學士亦出位答揖

詞林典故

大學士上任內閣翰林院官各具公服于誥勅房齊集大學士至此更朝服典籍導引至滿本堂公坐上任時典籍先至大堂通知滿漢大學士學士俱于階下迎候大學士入大堂與滿漢大學士各一揖與學士總一揖按座次入座學士亦隨入座開坊之翰林詹事官參見行四揖禮退大學士送至檻外編檢參見行四揖禮退庶吉士參見行四揖禮退俱不送次內閣侍讀學士侍讀典籍中書中書科中書并各館官員參見俱行四揖

禮凡參見官員行禮大學士俱答揖 本朝典籍廳呈送
大學士上任儀注

康熙十八年十一月以原任掌院學士徐元文爲內閣
學士 諭大學士等曰內閣與翰林院官不妨互爲調
用其行坐之處照進衙門先後以定次第 詞林典故

內閣漢中書典籍侍讀見大學士行師生禮其稱謂亦
如之初見向上三揖大學士起立大學士或令密書奏
摺或令代閣學票紅亦得于堂上旁坐若閣學之與中
書更無統屬中書到任見閣學一揖如賓主禮閣學到
任亦至各房中書拜揖

京朝官行前後輩禮者內閣與翰林院都察院三衙門

惟翰林院有一科後稱待生七科後稱晚生之分而內

閣與都察院凡屬後進者皆稱侍生金總憲德瑛曹侍

郎秀先乙卯年進內閣丙辰卽中進士入翰林而林右

通枝春涂少空逢震先于庚戌年進內閣至丁巳己未

始中進士入翰林彼此各行後輩之禮其有進內閣翰

林院在前而進都察院在後者亦照此例行

京官除翰詹外五品以上始得掛數珠而中書在軍機

處及紅本處行走者雖七品亦掛

國朝相沿內閣官及翰林院充內閣各館纂修官者皆

不坐班孫紫靜中書樂所云朝賀免隨班是也自乾隆

十三年以後學士而下仍坐班惟軍機處行走 圓明

園輪直及票簽之侍讀中書則行文知會免其查參
內閣惟典籍廳關防一顆本衙門及各館行文關支銀
兩及移取檔案皆用之常有典籍關防行典籍廳者
至各部院行文內閣只稱移會典籍廳而典籍廳行文
直移會各部院是以用印之處甚多本朝各部院堂司
印皆滿官掌之惟典籍印滿漢官輪直分掌以用印無
定期一人專掌則無休沐之期矣

凡視朝 駕未出則內閣大學士學士翰林起居注官
都察院左都御史副僉都御史先入候 駕駕出先于
保和殿升座內閣都察院起居注官行禮畢先自御路
趨往太和殿內閣立殿門外東西向都察院立殿門外

西東向然後 駕至升座諸王分東西班魚貫而入數
茵于地而坐起居注班諸王後東向其諸王謝 恩則
拜于臺階之上畢然後尙書已下文武官員謝 恩行
三跪九叩頭禮畢然後外國陪臣行禮亦如之 分廿餘
話

按詞林典故改保和殿爲中和殿增內大臣侍衛禮
部詹事府堂上官

國朝拜免將相以及陞調官員皆用白奏本紙繕寫
諭旨內閣傳鈔吏兵二部行文而已惟新進士引 見
用爲庶吉士等官庶吉士散館授爲編修檢討等官皆
用黃裱白鹿紙硃書 諭旨傳吏部堂官祇領吏部仍

具本奏繳

凡將軍都統總河總漕督撫提鎮學差鹽差關差倉場
侍郎戶工二部錢法堂坐名 勅書及布按二司守巡
各道鹽運使副參遊等官傳 勅以及外藩 勅書俱
用龍邊黃裱白鹿紙墨書用 寶頒給其最重者國家
大慶典 頒發詔書用黃裱白鹿紙墨書奏請用 寶
頒于天下

各衙門奏摺皆用白奏本紙繕寫惟國家慶典一應奏
摺表箋詔式以及冊文寶文皆用黃香箋紙繕寫襯用
黃紙或紅紙面用黃綾 奏書表文箋文用紅裱紙黃
綾面惟 皇上進 皇太后正表文用本色白鹿紙卷

而不招

大學士罷相辭朝於出國門時原品休致者赴 宮門
具摺奏辭革職者赴 景運門行三跪九叩頭禮守門
者爲之啟奏孝感熊青嶽罷相辭朝于大清門外碁盤
街行禮不知何據

中書典故彙紀卷四